

7857/A

~~8587~~

E xii p
18

49116
DOMINICI CYRILLI

M. D. ET IN NEAPOLITANO GYMNASIO

MEDICINAE PROF. &c. &c.

TRACTATUS

DE PULSIBUS.

EDITIO PRIMA.




NEAPOLI 1802.

Expensis LUCAE MAROTTA.

Typis DOMINICI SANGIACOMO.

Superiorum permissu.





TRACTATUS

De Pulsibus.



OST detectam, atque illustratam
sanguinis circulationem omni-
bus compertum est, quod ar-
teriosi systematis vasa continua

a corde motu accepto sanguinem venis commu-
nicant, ut rursus ad cor perducant. Vetusta
tamen arteriarum tenuissimo sanguine, & aëre
sive spiritu magna ex parte repletarum opinio,
quae ab omnibus hypothetica existimabatur, re-
centissimis Equitis de Rosa experimentis ex-
tra omnem dubitationis aleam collocatur. Ar-
teriarum itaque pulsatio non modo sanguini,
sed praesertim vaporibus expansilibus animali dicto
originem debet. Ab hoc rursus vapore pen-
det praecipua differentia, quae inter arterio-
sum, & venosum sanguinem observatur. Ab
aëre atmosphaerico tempore respirationis pul-
monibus subministratur vapor expansibilis, qui

caloris animalis, & primum vitalitatis fundamentum constituit. Omnia, quae hujus inventi veritatem, & utilitatem ostendunt, desumi possunt ab ejusdem Auctoris Literis Physiologicis. Pulsus itaque dicitur alternus arteriae motus, quo sc. diversa dilatatio semper contractioni respondet, atque secundum varia vitae, & corporis accidentia mutatur arteriarum assidue dilatatio. Primis nempe vetustissimis Medicinae temporibus, dum Medici arterias spiritum, venas sanguinem continere existimabant, arteriae vasa *pneumatica* dicebantur. Multi praeterea fuerunt, qui de pulsationibus arteriarum aliquid saltem memoriae prodiderunt, atque brevi pulsationem vasorum peculiari voce *Sphygmus* designarunt. Varia sane extant Hippocratis loca, in quibus de pulsu sermo est. In libello enim de alimento haec adnotantur: *Venarum pulsationes, & respiratio juxta aetatem & consonantia, & dissonantia sunt morbi, & sanitatis signa*. In praenotionibus deinde, ubi signa ex praecordiorum statu enumerat, ait: *si vero pulsus etiam inerit in praecordio,urbationem significat, ut delirium*; atque hoc in loco utitur voce *Sphygmus*. Inter veteres tamen multi pulsum esse simpliciter motum in venis insigniter adauctum tempore alicujus inflammationis existimarunt.

Non sine magna profecto admiratione Galenica pulsum doctrina perlegitur. Pulsus deinde naturalis peculiariter dignoscendus est secundum memoratum Scriptorem. Semper autem
dis-

differt secundum hominum aetatem, temperamentum, anni tempus, vivendique rationem. Quod si reperias pulsum praeternaturalem latitudinem majorem, appellabis Latum, si longitudinem, Longum, si profunditatem, Altum, haec sunt ipsius Auctoris verba. Superioribus contrarii sunt angustus, brevis, humilis, ac rursus parvus, & magnus. Ad motus qualitatem, sive ad tempora, quibus omnia singula pulsationis accidentia absolvuntur, pertinent celeritas, & tarditas. Celeritas enim est differentia temporis, quod intercedit inter initium, & terminum dilatationis corporis arteriosi. Tarditas contra componitur rarioribus intervallis inter primam, & secundam pulsationem. Ad eandem arteriae qualitatem referri debet vehementia, & remissio, quandoquidem vehemens pulsatio maximam, remissa minimam arteriae dilatationem postulat. Arteriae deinde essentialis qualitates sunt mollitudo, & durities. Mollitudo dicitur, ubi arteria quasi carnosior in occurso, idest in contactu apparet. Durities deinde appellatur arteriae siccitas, atque rigiditas; dura etiam arteria ad modum corii est. Ictum describit Galenus, aitque: *Ictus est contractio, atque expansio arteriae tactui occurrens; intervallum vero est tempus quietis inter duos ictus*. Ab hujusmodi intervallo nascitur distinctio inter varias pulsationes; unde dum brevissima sunt tempora inter utramque pulsationem interposita, pulsus creber; si magna, & protracta, tardus appellabitur. Creber

autem brevissimum quietis tēpus, rarus longum indicat. Omnibus modo descriptis differentiis supervenire potest aequalitas, atque inaequalitas in pulsationum intensitate. Hinc continens, sive constans paritas in ictu arteriae aequalitas est ex Galeno. Inæqualitas vero est paritatis corruptela in quamcumque cadat differentiam. Etenim pulsus est aliquando inaequalis, sed ordinatus, quia constanter post certum tempus pulsationum numerus inaequalis fit, uti accidit in diarrhoea critica, atque in critico sudore. Dum omnino perturbantur circulationis leges, pulsus inaequalis inde exurgens inordinatus vocatur. Hoc fit in vehementi pavore, aut aliquo insigni animi pathemate. Unius tantum pulsus differentia quoad inaequalitatem observatur in pulsu dichroto, atque in omnibus pulsationibus, qui affectis sedibus respondent. Compositae fiunt inaequalitates, ubi in eodem subjecto varia inæqualitatum genera observantur, ex.gr. in morbis cordis, in aneurysmate, atque in hydrothorace intermittētia cum aliis inaequalitatibus coniungitur. Nam si undosae pulsationi una, aut altera pulsatio miscetur simpliciter æqualis, vel modo magna, modo parva, varium simul videbimus inaequalitatis genus. Inter inaequales pulsus recensentur vermiculans, formicularis, & hecticus. Vermiculans undarum in modum insurgit, neque uno tempore arteria distenditur: huic definitioni adjiciendum, quod vermiculans pulsus undas habet sensim decre-

scen-

scientes, si parva erit distentio vermiculans; si magna, pulsus appellabitur simpliciter undosus. Vermiculans vero est semper languidus, & creber; in extremo vero febris remissione crebritas, & parvitas constituunt pulsum formicantem, cujus exempla frequenter in moribundis occurrunt. Hecticus pulsus non magnopere variat, sed manet in perpetuum similis, quia in hujusmodi febribus, & pulsibus integra corporis oeconomia afficitur. Et sane hectica febris continua est, matutinis tantum horis remittit, verum semper proprium servat characterem; nam summa adest in arteria celeritas, & frequentia cum parvitate conjuncta. Hujusmodi characteres matutino tempore debiliores, vesperam versus insignes apparent.

Differunt deinde pulsus secundum sexus, & temperamentum; viri enim mulieribus pulsum habent longe tum majorem, tum vehementiorem, ac paulo tardiolem; quod quidem a validis hominum exercitationibus, diversoque vitae genere oritur. Verum viri occurrunt faemineo temperamento praediti, in quibus pulsus fluidorum, solidorumque constitutioni respondent. Calidiores natura pulsum habent multo celeriolem, majorem, & crebriorem, vehementiorem non item multo. Graciliores majorem, rarioremque multo pulsum habent; non autem vehementiorem. In diversa aetate variat pulsus; infantis enim pulsus creberri-mus est, tardissimus senis, quo senex a puero longe magis raritate, quam celeritate differt;

nam potest in sene pulsus fieri celerrimus, & simul tardus. Vehementissimus enim est pulsus juvenum, lentissimus senum. Mutantur quoque pulsus in diversis anni temporibus; medio enim vere maximi, & vehementissimi, quoad celeritatem, & crebritatem moderati sunt. Pari modo vigente autumno ob tempestatum analogiam pulsus similes observantur. Ineunte aestate languidi, parvi, celeres, crebrique sunt ob nimiam caloris activitatem, atque ob perennem fluidarum particularum dissipationem. In autumnii progressu cuncta imminuuntur, & retardantur, atque ineunte hyeme parvitas, tarditas, & raritas in arteriis observatur; omnia enim in constitutionis statu versantur, frigidusque aer magnam naturalis caloris copiam attrahit. In diversis regionibus pulsus etiam differunt juxta temperiem atmosphaerae, atque ideo tempestatum naturam sequuntur. Praegnantium pulsus majores, crebriores, celerioresque sunt, semper vero in diverso graviditatis tempore pulsus mutantur, atque si celeres sunt in tota gestatione, instante partu celerrimi, atque exteriores redduntur. In somno parvitas, & tarditas observantur, primo ob virium muscularium debilitatem propter praegressam vigiliam, secundo quia dum partes immobiles jacent, actionesque omnes silent, nervorum influxus magnopere imminuitur, ideo pulsus parvi, & tardi evadunt. Contra qui a somno excutiuntur, statim pulsus magnos, vehementes, celeres, crebros, & vibra-

tos habent. Attamen post breve tempus mediocritatem assequuntur. Vibratio hoc in loco a Galeno pro duritie collocatur; nam in vibratione rigidus, & durus arteriae contactus animadvertitur.

Multae sunt causae, quae pulsum regularitatem mutare valent. Ex. gr. ab exercitatione moderata pulsus redduntur vehementes, magni, celeres, & crebri, rursus ab immodica actione musculari parvi, languidi, celeres, & summopere crebri fiunt. Atque si ob immoderatam admodum exercitationem vires exolvuntur, tunc pulsus evadunt magnopere parvi, languidi, tardi, ac rari. A balneo moderate calido magnus, celer, creber, & vehemens redditur pulsus; a nimium calido languidus, tardus, parvus, atque rarus; a balneo frigido pulsus oritur parvus, languidus, tardus, ac rarus; ob hanc rationem acutarum febrium summa celeritas, & frequentia balneo frigido magnopere imminuitur. Haec tamen omnia eveniunt ob naturalis, vel morborum caloris dissipationem. Aqua enim primum ignearum, & volatilium particularum vehiculum constituit. Ciborum quantitas nimia, quae stomachus gravatur, pulsus inaequales, atque inordinatos efficit. Inaequalitas pulsum tempore digestionis fortasse oritur ab actione ventriculi, & alimentorum separatione; nam hoc tempore pulsus fiunt valde similes pulsibus suppurationis, quemadmodum suo loco demonstrabitur. A vino abundanter ingurgitato pul-

sus

sus uti a cibo variat , sed promptius , atque mutationes celeriter evanescunt : attamen vinus usus immoderatus pulsum gignit magnum , vehementem , & exteriorem ; vini enim qualitates calidae , & diaphoreticae sunt . Aqua minime in pulsibus mutationem inducit ; attamen servata proportione secundum aquae copiam , & qualitates , nonnullae mutationes observantur praesertim dum aquea diaeta in morbis instituitur .

Non solum causis nonnaturalibus modo enumeratis , sed etiam a causis praeter naturam pulsus mutantur . Nam secundum Galeni sententiam excessus in quantitate causarum naturalium , & nonnaturalium transeunt ad statum praeter naturam . A causis vero praeternaturalibus vel dissolvi , ac dissipari , vel quasi gravari solet facultas vitalis . Dissolvitur facultas alimenti difficultate , morborum malignitate , animique affectibus : a vehementia deinde , vel diuturnitate dolorum , & denique ab immodicis evacuationibus lethalis oritur facultatis vitalis imminutio . Laetitiae magnus , rarus , & tardus est pulsus , quia hoc tempore solidae partes relaxantur , atque ob adauctam internarum , externarumque secretionum copiam , cutis praesertim mollescit , ac sanguini parvam profecto resistantiam opponit . Tristitiae pulsus parvus , languidus , tardus , & rarus est ; dum enim molesta aliqua , profundaue animi perturbatione afficimur , tunc in cerebro magna nervei fluidi quantitas retinetur , ac proinde

regularis influxus in reliquas partes imminuitur; hinc tristes homines frequentissimis horripilationibus corripuntur, & parum perspirant. Timoris recentis, & vehementis pulsus celer est, vibratus, inordinatus, & inaequalis; timor vero diuturnus pulsum tristitiae gignit. In pavore enim instantaneo ab imminente periculo, aut obstaculo quocumque natura junctis viribus adversus causam noxiam operatur. Verum timoris causa evanescente, in languoris, ac imbecillitatis statum transeunt homines, uti accidit mulieribus satis frequenter post vehementissimas hystericas convulsiones. En quare pulsus post diuturnum pavorem pulsui tristitiae simillimus evadit. Haec omnia animi pathemata si vehementiora, & persistentia sunt, pulsum dissolutae facultatis vitalis gignunt. Dolor parvus, atque in principio pulsum efficit majorem, vehementiorem, celeriore, & crebriorem; acutus vero minorem, languidum, celerem, & crebrum: causa morbosa, quae dissolvit omnino vires vitales, in remissione morbi parvitatem, & quamdam celeritatis speciem in pulsibus excitat. Pleuriticorum celer pulsus, & crebrer est, vel aliquando admodum magnus; verum proprietates retinet pulsus inflammationis, siquidem in principio durus, parvus, & celer, in progressu magnus, vehemens, atque evolutus est. Si punctorius dolor evanescit, persistente adhuc expectoratione, pulsus inflammatorii character deletur. Multa adnotatione digna complectitur sequens

definitio pulsus suppuratorii a Galeno propo-
 sita, suppuratorius sc. pulsus initio statim pu-
 lum refert vigentis inflammationis; hoc enim
 initium est suppurationis: nonnumquam inae-
 qualis est, & inordinatus, sed in omnibus he-
 cticus. Cum autem pus prope sit maturum, ce-
 tera similis est, nisi quod aequalior sit; at cum
 pus erumpit, languidior, latior, tardior, ra-
 riorque est. Inaequales, atque inordinati sunt
 pulsus suppuratorii, quia natura gravissimum
 obstaculum superare conatur, & ubi majus, ad-
 hibet vires majores, & in motu circulatorio irre-
 gularites oriuntur. Hecticus vero est suppu-
 rationis pulsus, quia in hoc casu continua adest
 febris cum insigni calore conjuncta, uti in ul-
 cere pulmonum. Aequalitas deinde post suppu-
 rationem a generali partium relaxatione ob-
 perfectam coctionem deducitur. Marcescentium,
 sive aegrorum tabe confectorum pulsus sunt va-
 rii; namque cum inflammatione ad tabem per-
 ducuntur: languidos, & celeriores pulsus ha-
 bent, atque pulsationum magnitudo valde im-
 minuitur: celeritas vero semper vespertinis ho-
 ris augetur. Omnes vero tabidi pulsum habent
 hecticum, idest languidum, & admodum cre-
 brum, calor magnus est; atque impetus feбри-
 lis post copiosum sudorem mitescit. Phthisico-
 rum, quos vocant, pulsus parvus, languidus,
 mollisque, & modice celer, & hecticus est.
 Peripneumonicorum pulsus magnus, undosus,
 languidus, mollisque est, uti pulsus lethargi-
 corum; aliquando etiam dichrotus, & saepe in-
 ter-

mittens deprehenditur . Initio morbi pulsus
 est magnus , sed rebus in pejus vergentibus
 arteriae parvae, obtusae, & inferiores reddun-
 tur . Dum detegitur intermittentia, pulsus pro-
 fundissimi generalem totius pulmonis gangrae-
 nosam degenerationem demonstrant . Lethargi-
 corum pulsus tardior, rariorque, ac minus
 aequalis, intermittens, dichrotus, atque undosus
 est . Omnes tamen inaequalitates, & inter-
 mittentiae si cum alicujus organi peculiari pul-
 su conjunguntur, congestionem, inflammatio-
 nem, aut suppurationem in eodem organo vel
 incipientem, vel absolutam praenunciant . Haec
 doctrina externorum, atque internorum mor-
 borum exemplo confirmatur; inaequalitates enim
 in erysipelate, diversique generis tumoribus
 cum pulsibus organicis copulatae observantur .
 Sed quoniam, progreditur Galenus, inaequalitates
 saepe meminimus, raro autem perturbationem
 ordinis, sciendum est fere semper inaequalita-
 tes comitari perturbationem ordinis; ac inae-
 qualem pulsum, qui fit ordinatus, raro inve-
 nias . Minoris vero momenti laesiones pulsus
 inaequales, sed ordinatos, majoris notae affe-
 ctiones pulsus generant inaequales, atque inor-
 dinatos . Phraeneticorum parvus, durus, ner-
 vosus, valde celer, & creber pulsus est; ha-
 bet aliquid undosi, ac subtremuli; totam enim
 arteriam, sua sede deserta, conspicias attolli
 potius cum vibratione, quam cum regulari di-
 stentione; immodica tamen crebritas in hoc
 casu animi deliquium praenunciat . Nil mirum
 si tan-

si tanta in pulsu phraeneticorum varietas
 servatur. Omnia enim accidentia irregularia
 sunt; quandoquidem a causa nervorum oeconomiae,
 & irritabilitati infesta excitantur. In
 convulsis ipsum corpus arteriae videtur contrahitum,
 & irritatum, & veluti rigidum, ut in
 febre, praesertim in accessionibus; nam rigores
 in febrium paroxismo sunt celerrimi convulsi-
 vi motus a valida, & involuntaria mus-
 culorum contractione pendentes. Ad eundem
 modum in convulsionibus arteriae motus inae-
 qualis est intar chordae sursum, deorsum
 que agitatae; jam vehemens quoque, & ma-
 gnus convulsorum pulsus aliquando videtur
 esse. Paralyticorum parvus, imbecillus, tar-
 dusque pulsus est; nonnullis rarus quoque, aliis
 creber, sed nonnisi inordinate intermittens.
 Comitialium, & attonitorum similes sunt pul-
 sus, atque in principio non mutantur. Si ve-
 ro adeo gravis sit affectio, ut oneret faculta-
 tem, inaequalitatem quamdam inducit, ac ten-
 sionem validam gignit: minor enim, languidior,
 rarus, tardusque pulsus efficitur. Si aegritudo
 haec magnopere comprimatur, atque afficiat
 vitalem facultatem, languidos, parvos, ce-
 leresque pulsus gignit. Anginae pulsus tensione
 praeditus magnus, & undosus est; tensio obser-
 vatur in principio, undositas vero modo reso-
 lutionis, modo suppurationis signum est. Si
 undositas progrediente primo septenario exur-
 git, tunc anginam suppurare dicendum est.
 Quicumque vehementer suffocantur, parvum,
 & ra-

& rarum pulsum habent, atque ubi jam animam agunt, crebrum, atque inaequalem possident pulsum. Hujus doctrinae insignis veritas elucescit in diversis peripneumoniae temporibus; quandoquidem peripneumonici dum in maximo vitae discrimine versantur, summam habent in pulsu crebritatem, inaequalitatem, atque intermittentiam. Haec profecto accidentia ab inflammatione pulmonum, difficilique sanguinis per vasa pulmonalia circuitu oriuntur. Hinc merito addit Galenus in orthopnoea acuta pulsus est inaequalis, & inordinatus, siquidem in hoc morbo circulatio pulmonalis valde perturbata est. Uterinae suffocationis pulsus uti in convulsionibus tardus est, & rarus; quod si suffocatio exitialis sit, pulsus redditur inordinatus, creber, & nonnihil deficiens. In omnibus internarum partium affectionibus statim ac pulsus deficiens, parvus, languidus, & internus evadit, morbum lethalem esse enunciabimus, ob facultatem, viriumque imbecillitatem. Stomachus ubi afficitur, juxta aegritudinis differentiam pulsum mutat. Venter enim inflammatus durum, sive nervosum habet pulsum, quocumque alio inflammatorio pulsu minorem, ob partis affectae naturam. Vellicationes, nauseae, vomitus, singultus, & languores non solum parvum, & languidum, sed etiam celeriores, & admodum crebrum pulsum efficiunt; praesertim ubi agitur de cardialgia, in qua si parvitati, & languori arteriae crebritas accedit, aeger in maximo

mo vitae discrimine versatur. Hydropicorum pullus juxta varias morbi species differt; ascite enim parvus est, crebrior, & subdum cum quadam tensione: in anasarca undosus, lator, mollisque est. Pulsus Elephantiasis parvus, languidus, tardusque est. Hystericarum pullus, si febris abest, minor, durior, numquam languidus, nec celer est. Qui veratrum, & helleborum sumpserunt, hi paulo ante vomitum pullum habent latum, rarum, languidum, & tardiolem, sed tempore vomitus pullus fit inaequalis, & inordinatus. Cum rectius habere coeperint, pullus evadit ordinatus quidem, sed inaequalis adhuc, minus tamen, quam antea. Verum omnes substantiae venenatae intus assumptae, si stimulantem possident naturam, quia phlogisto salino, nempe alcali phlogisticato componuntur, pullum parvum, crebrum & inaequalem gignunt, quemadmodum evenire solet cum fungis venenatis, & cicuta aquatica. Sed eja ad alias doctrinas.

Arteria in homine sano quatuor, vel quinque pulsationes perficere debet, dum Medicus carpum contrectans unicam absolvit respirationem, inspiratione sc., & expiratione simul sumptis. Quo igitur micationes hoc dato tempore decrescunt quoad numerum, pullus fit tardus, ac lentus. Ubi vero ultra quinque pulsationes observantur tempore unius respirationis, pullus celer, & crebrus oriri incipit. Huiusmodi pullus non solum celer, sed etiam praecipitatus, & furiosus appellatur. Sequuntur

dis,

differentiæ majores dictæ, quæ rursus in octo subdividuntur. Priores constituunt pulsus externos, & internos. Horum pulsum externi externos, cutaneos, & superficiales; interni internos, & præsertim organorum morbos designant.

Pulsus externi sunt magis apparentes, interni contra magis absconditi, & quasi retrogredientes. Haec autem conditio constanter in praxi observatur, dum in gravissimis morbis aegri ad interitum vergunt. Ubicumque vero pulsus externi deprehenduntur, morbus imminenti saltem periculo caret. Species vero siue differentiae pulsum externorum septem recensentur.

I. Natans, siue superficialis vacuum fere; idest mollem arteriam efficit, atque dum digiti carpo admoventur, adeo prominet, ut fere absque ulla pressione observari potest.

II. Vacuus proprie pulsus est, in quo digiti arteriam comprimentes nullam pulsationem in centro percipiunt, & ad latera marginis speciem sentiunt, quemadmodum accidit, ubi digitus foramini tibiae applicatur.

III. Frequens, & acutus pulsus, atque in febrium initio frequentissimus, dum vehementi stimulo, & spasmo coarctatae arteriae parvam, acutamque superficiem tangenti opponit.

IV. Differentia denotat pulsum superiorem, sed magis plenum, ac dilatatum, uti observatur in febribus tempore remissionis, aut proximae intermissionis.

V. Hoc loco recensetur pulsus durus, tremens, & longus, cujus micationes rigidissimis, ac valde tensis musculi instrumenti chordis assimilantur.

VI. Pulsus dicitur tremulus, sed parvus, & brevis, quapropter ea ratione a praecedenti differt, & summam virium imbecillitatem declarat.

VII. Nempe inflatus, & exundans ille est, cujus micationes magnopere elevantur, ac vehementes sunt, uti observantur in progressu erysipelatis, atque in externorum tumorum actuali suppuratione.

Pulsuum internorum species octo numerantur.

I. Profundus, & sepultus ille est, qui percipi nequit absque maxima arteriae compressione; hinc admodum generalis est, & summum morbi periculum ostendit.

II. Internorum altera species, nempe pulsus parvus, tenui filo simillimus est, fere semper tardissimus proximam mortem designat, atque passim observatur aneurysmaticorum maximo discrimine, in magnis tumoribus abdominis, atque in desperato tabidorum statu.

III. Est lentus, atque remissus, qui tres fere in unica respiratione pulsationes absolvit.

IV. Acris, asper, aut rarus est, qui pulsationibus constat asperrimis, quæ similes sunt stridori cannæ, dum superficies cultello abraditur.

V. Dicitur lentus, rarus, ac tardus, quia valde absconditur, & occulte incidit.

VI.

VI. Fugitivus ille est, qui decedit, deprimi-
tur, atque quo magis comprimitur, magis oc-
cultari videtur.

VIII. Mollis, fluidus, vel mollis subtilis
est, qui dum premitur, evanescit, quemadmo-
dum aquae gutta, quae digitis tangitur, prae-
cedenti valde similis; ille enim cum medio-
criter comprimitur, debiliter micat, & in ma-
jori pressione omnino evanescit.

His positis Sinenses tres partes in arteria
distinguunt, & tres digitos arteriae carpi adeo
admovent, ut primus carpi initio respondeat,
secundus ubi carpi cum ulna articulatio absol-
vitur, tertius apophysi radiali, quae ipsis vul-
go cubiti extremitas appellatur. Pullationes
itaque peculiaribus digitis respondentes in
statu naturali varios characteres actioni visce-
rum, a quibus modificantur, analogos habere
consueverunt. Pulsus nam dexter a sinistro
differt, atque haec differentia varios simplices
characteres subministrat. Succedunt modo pul-
sus monstrosi, proximi nempe periculi indi-
ces, ut

I. Ille est, qui ebullientis vehementer ali-
cujus flammam speciem praebet, atque sulphuris
nominis designatur; in lethalibus internarum
partium inflammationibus observatur vigente
torbo; sed in hoc casu dum partes affectae
in mortificationem transeunt, pulsus parvi,
obscurique fiunt.

II. Inter monstrosos a Sinensibus piscium
motibus assimilatur, atque est pulsus internus,

profundus, & admodum inaequalis, in quodammodo animationes modo animadvertuntur, modo evanescent.

III. Undoso similis dicitur *Jeon*, atque pulsationibus magnis non tamen perfectis constat, adeo quidem ut unda postrema, praecedentibus superatis quoad magnitudinem, integram dilationem absolvat.

IV. Admodum rigide, & cum quadam siccitate digitos afficit, semper vero inaequalis est, appellaturque *anima cadaveris*.

V. Componitur tribus, vel quatuor frequentissimis pulsationibus, quibus intermittentia brevis succedit.

Reliquae hujus classis sunt pulsum inaequalium, atque inordinatorum minutissimae varietates, quae difficulter simplicibus definitionibus complecti possunt. Semper vero in omnibus morbis irregularitas pulsationum vel mortem, vel organicam aliquam laesionem significat. His explicatis pulsus organicos Sinen- sium illustrandos gradus faciamus; siquidem peculiaris alicujus organae perturbatio certam in pulsu mutationem ostendit, quamvis multum etiam tribuendum sit aetati, temperamento, anni temporibus, sexui, aliis. In corpore humano juxta Orientalium doctrinam quinque considerari debent viscera naturalia, scilicet Cor, Hepar, Pulmo, & Renes. Hisce scilicet minus essentiales partes organicae subjiciuntur. Cordi enim tenuia intestina, hepatis vesicula fellea, pulmonibus crassa intestina respondent.

Viscera admodum adnotata propriam actionem naturalem, & praeternaturalem perturbationem in distincto arteriae loco declarant. Cordis enim actio, sive imperium in statu naturali percipitur ex pulsu carpi, nempe in parte anteriori arteriae, atque haec particula arteriae satis magna, plena, & regurgitans. Hinc in cordis affectionibus, syncope, palpitatione, & aneurysmate plerumque deficit, minuitur, vel cum magna imbecillitate dilatatur. Hepatis pulsus investigandus est in articulo dextero, ubi dum in statu sano versatur, pulsationes longae, ac tremulae observantur. Proprius stomachi pulsus detegitur in carpo brachii dexteri, atque moderata tarditate a reliquis distinguitur. Pulmones pulsum mutant in articulo carpi dexteri; redduntque superficiale, durum, & parvum. Pulsus dexteri renis observatur in cubito brachii dexteri, & renis sinistri pulsus in oppositis lateris cubito animadvertitur. In statu sanitatis, praesertim hyberno tempore pulsus renales profundi, & fere tremuli sunt.

In diversis anni tempestatibus pulsus insigniter mutantur, atque pulsum organicorum characteres magis perspicui, patentelque redduntur. Ita duobus primis veris mensibus pulsus hepatis maxime eminet, atque solito longiores, patientioresque undulationes efficit. Aestatis initio cordis imperium observatur, quia pulsus organicus turgidus, atque vibratus est. Primis mensibus autumnii pulsus pulmo-

nales magis generales sunt, atque superficiales, breviores, & asperiores redduntur. Initio hyemis renales pulsus praesertim observantur; sunt enim profundiores, atque tenuiores. Denique singularum tempestatum tertius mensis pulsus reddit stomachalem, in quo non solum moderata tarditas, verum etiam aliqua in dilata-tione arteriae amplitudo detegitur. Ab alimentis etiam pulsus mutari existimant Sineses, atque a duplici causa, morbis sc. & animi commotionibus rithmum perturbari contendunt, quandoquidem uniformis tempestatum, elementorum, ac Planetarum actio pulsus in statu naturali retinet. Animi pathemata quoad proprios effectus septem sensibiles in pulsus mutationes inducunt; Laetitia etenim pulsus mediocriter tardum, Misericordia brevem, & Tristitia asperum, sive durum reddit. In summa animi perturbatione pulsus semper inordinatus, sive inaequalis evadit; in Timore profundus, atque in pavore instantaneo admodum celer redditur. Denique ira pulsus valde celerem rigidumque constituit.

Variat rursus pulsus in morbis juxta affectarum partium naturam, constitutionem, atque officium. In genere vero septem pulsus externi, atque octo interni morborum externorum, atque internorum signa, & causam indicant. Aegritudines vero, quae in peculiari aliquo organo sedem habent, pulsus parti affectae, sive affecto lateri respondentem perturbare solent. Pars haec scientiae sphygmicæ

ad prognosim immediate nos perducit. Animadvertendum itaque, quod corpus humanum nervis, musculis, venis, & arteriis adeo compositum sit, ut musicis instrumentis merito comparari possit; quandoquidem partium actiones, uti chordarum toni, magnopere inter se differunt; quod quidem pendet a figura, variisque sensationibus, diversaque structura. Dum Sinenses de pulsu sani hominis loquuntur, praeter numerum micationum, quae in adulto, uti dictum est, quatuor esse debent unius respirationis tempore, varietatem adjiciunt in infantili, atque decrepita aetate admodum constanter evenientem. Pulsus itaque in infantia, idest a tertio usque ad quintum annum, dum bona valetudo viget, octo pulsationes tempore unius respirationis perficere debet. Si vero pulsationes ad novem, decem, & duodecim perveniunt, praesertim si frequentiae irregularitas accedit, tunc de aliqua morbosa affectione dubitandum est. Senio confecti homines pulsum in genere tardum, debilemque habent; sed senes aliquando ob universalem partium rigiditatem pulsu gaudent duriusculo, vehementi, celerrimoque. In pulsu differentia illa, quae a sexu provenit, non est spernenda; siquidem in masculo pulsus carpi majorem habet vehementiam, quam pulsus cubiti, & dummodo contrarium accidit, morbi alicujus, praesertim in renibus generatio in propinquo est. Rursus pulsus dexter in femina multa significat, atque admodum vehemens est, ideoque

in dextero brachio mulierum , contra in sinistro hominum pulsus explorandus est . Tempore menstruae evacuationis pulsus dexter sinistro vehementior redditur , certam vibrationem , atque inaequalitatem assumit . Gravidae mulieres vario gestationis tempore pulsum habent omnino diversum . Primis enim mensibus parvus est in carpo , celer in cubito ; dum insigniter premitur arteria , si pulsus apparet parvus , & inaequalis , de tertio gestationis mense agitur ; si celeritas augetur , in quinto mense mulier versatur . Hujusmodi pulsus in sinistro brachio marem , in dextero feminam declarat . Multa alia ad graviditatem pertinentia adnotantur , quae a nobis brevitatis gratia praetermittuntur .

A numero deinde , & aequalitate pulsationum varia oriuntur praesagia . Quinquaginta enim mications aequales sine ulla intermittentia si observantur , homo optima valetudine fruitur ; si deficit una ex quinquaginta pulsationibus , tunc pulsus a statu naturali aberrat , atque eo graviores ostendit morbum , quo minor est numerus aequalium pulsationum inter duas intermittentias . Igitur quo frequentior intermittentia , gravior erit morbus , semperque in hisce casibus de visceris alicujus essentiali affectione cogitandum . Inter dogmata vero diagnostica fundamentalia adnotandum organorum statum , & constitutionem recte se habere , quando arteria quadraginta quinque pulsationes aequales absque ulla sensibili inter-

ruptione absolvit. Quod si pulsus cordis in sinistro carpo observabilis post descriptum pulsationum numerum per breve tempus sit inaequalis, in periculo non admodum magno aeger versatur. Contra si post trigesimam primam micationem pulsus per longum tempus profundus redditur, mors post paucos menses evenire debet. Si pulsus hepatis post viginti sex micationes profundus, obscurusque evadit, insignis deprehenditur in hoc organo obstructio, cujus suppurationem declarabit idem pulsus post decimam nonam pulsationem alternatim elevatus, profundusque. Haec praesagiendi ratio pulcherrima quidem, sed difficillima est. Sed satis.

Anno 1737. Franciscus Solanus de Luque ingeniosissimus Hispanus Medicus novas, magnique momenti observationes de praedictione crismum ex pulsu conscripsit, atque multorum morborum, ac morbosorum accidentium prognosim facillimam reddidit. Primo itaque loco exponit signa, & leges pro praedictione criticae narium haemorrhagiae. Haec autem critica evacuatio indicatur a pulsu dichroto antiquorum, qui a Latinis bis feriens nuncupatur; et fere semper cum undoso, seu cum pulsu sudoris confunditur. Dummodo igitur arteria magna cum celeritate bis feriat, tunc nasalis haemorrhagia expectanda. Verum eo citius, vel tardius dichrotismus apparet, quo duplex, grandior, duriorque pulsatio citius, vel tardius deprehenditur inter reliquas regula-

lares micationes . Quod si post criticam sanguinis evacuationem etiam dichrotus pulsus superest, denuo haemorrhagia expectanda est . Si secundus arteriae ictus (haec sunt ipsius Auctoris verba) in uno carpo eminentior sit, quam in altero , sanguis saepe ex nare illius lateris, in quo secundus ictus evidentior est, majori abundantia erumpit . Critica narium haemorrhagia ex pulsu superiori dichroto dignoscitur . Fluxus sanguinis ex aliis sedibus pulsum gignit magnum, & durum . Ita ipsius sanguinis menstrui imminens evacuatio pulsum efficit undosum, duriusculum, & inaequalem . Secundo loco simul complectitur praedictionem diarrhoeae criticae, & crisis per vomitum, vel per urinam . Pulsus itaque intermittens certum indicium est futurae diarrhoeae criticae, & tunc tantum mortem portendit, cum robur ad perficiendam crisin requisitum deficit . Intermissio illa, in qua unicum diastoles tempus desideratur, mediocrem, vel parciorem alvi evacuationem indicat . Duplex deficiens diastole cum dimidia profusam significat evacuationem . Tensio sive durities arteriae cum pulsu intermittenti conjuncta certum est non solum diarrhoeae, verum etiam vomitus critici indicium . Non solum circa criticam futuram alvi relaxationem in acutis, verum etiam in chronicis intermittentia occurrit, quamvis non semper genuina intermissio, sed summa inaequalitas intermissioni fere similis deprehendatur . Major, aut minor arteriae tensio ma-

jorem; vel minorem per vomitum evacuationem, simulque plures, vel pauciores vomendi conatus denotat. Mollitudo arteriae una cum intermissione certum indicium est crisis per alvum, vel per urinam; & major, minorque quantitas excretionis per urinam a majori, aut minori mollitudinis gradu in arteria denotatur. Attamen praecipua haec mollitudo, quae a Solano memoratur tamquam signum crisis per urinam, non est simplex mollitudo, scilicet diminuta arteriae resistantia contra prementes digitos: hoc enim in casu tremoris, sive undulationis eodem tempore sensatio animadvertitur; quae quidem in omnibus fere vesicae morbis observatur. Nunquam adnotavit Solanus simplicem crisin per urinam sine ullo diarrhoeae concursu: hinc signa utrique mutationi communia sunt.

In tertio capite progreditur Solanus ad signa, & leges pro praedictione sudoris critici, Pulsus sudoris. atque sequenti definitione pulsus sudoris descriptionem complectitur; ait enim: Species est pulsus inaequalis in una, duobus, tribus, quatuorve successivis pulsationibus tam altitudine, quam vigore supra alias diastoles insurgentibus: sudor vero criticus procul dubio expectandus, quando undositas haec, sive mollis arteriae magis protracta dilatatio diutius substinetur, & profundam digitis affert impressionem. Sed ut adnotatus sudoris critici pulsus recte constituatur, necesse est, ut tres, vel quatuor pulsationes sensim majores, & insur-

gene

gentes in arteria animadvertantur. Hoc modo natura nobis ostendit materiae, quae evacuari debet, copiam semper non interrupto influxu externas corporis sedes versus urgeri. Hujusmodi pulsum proprie Inciduum Solanus appellavit; ab aliis vero dicitur pulsus inaequaliter adsurgens, vel increfcens. Hoc tempore morbi cum pulsu inciduo mollities non solum arteriae, sed universae etiam cutis conjungitur; neque deest perspirationis certa quantitas, quae signum, & causa relaxationis est. Mollities arteriae aliam constituit differentiam, unde dignoscitur pulsus eruptivus in morbis cutaneis, utpote variolis, morbillis, erysipelate, aliisque frequentissimus. Nam dum cutis causam morbosam ab internis sedibus accipit, pulsus inciduus sudoris critici pulsui similisprehenditur. Quantitas denique sudoris critici est in ratione composita ex numero, & vigore ictuum in pulsu inciduo adsurgentium.

Inter recentiores artis sphygmicae cultores primum certe locum meretur Cl. Bordeu Parisiensis Medicus, cujus observationes de pulsibus magni momenti doctrinam includunt. Galeni itaque, & Solani principiis innixus doctissimus Auctor, considerata primum indole pulsum in statu naturali, ad morbosas circulationis perturbationes illustrandas progreditur; neque artis sphygmicae generales regulas, neque in omnibus morbis evenientes pulsum differentias proponit, verum criticos nonnullos pulsus, variasque uniformes, & constantes devia-

viationēs persequitur. Primo itaque tria in morbis tempora distinguit, in quibus pulsus in cruditate, coctione, & crisi versatur. In cruditate itaque observatur pulsus irritationis, in coctione pulsus evolutus coctionem indicans, atque in crisi adest pulsus excretionis. Ad primam differentiam quod attinet, in omnium morborum, praesertim acutorum initio solidae partes insigni stimulo correptae angustantur, canalium diameter valde imminuitur ob caloris naturalis defectum, humores vitiosam spissitudinem, majoremque cohaerentiam acquirunt, vel peculiari acrimonia praediti stimulum afferunt. Hoc in statu pulsus acutus est, convulsivus, durus, ferratus, nervosus, & nunquam criticus. Haec praeternaturalis perturbatio, dummodo vires adhuc vigent, paulatim decrescit, solida rigiditatis statum amittunt, humorum circulatio facilius redditur, fluida heterogenea ob calorem, & actionem vehementis circulationis asperitate, acrimonia, aut alia quacumque noxia qualitate spoliantur. Tunc humores in organorum cavitatibus collecti, & canalium parietibus afixi separantur, communique liquidorum massae immixti novum motum, minime tam periculosum gignunt, unde pulsus evolvitur, dilatur, atque criticam mutationem praenunciat. Post beneficam causae modificae coctionem, quae dignoscitur a pulsu voluto, molliorque, majori relaxatione superveniente, per propriae critica elevationem perficitur. Hinc

in morborum principio si pulsus irritationi post certum tempus in evolutum mutatur, futurae optimae crisis spem affert; contra si diutius progrediente morbo substinetur, causae magnitudinem, & intensitatem, simulque virium vitalium imbecillitatem luculenter ostendit. Substinetur quoque, & augetur non raro pulsus irritationis ab inconsiderata multorum medicamentorum administratione. Ita cortex Peruvianus ante coctionem, debitalque evacuationes morbum ultra limites naturales protrahit; imo etiam chronicas aegritudines gignit. Evolutus, sive coctionis pulsus exitum quoque morbi ab omni fere periculo alienum portendit. Criticus vero pulsus semper cum evolutio conjungitur, praesertim in principio; nam in progressu duritiem, & inaequalitatem amittit post vitiosarum substantiarum evacuationem. Omnes tamen pulsus critici viam, sive emuncturium ostendunt, cujus opere evacuatio perfici debet, ac proinde dum a pulsu organico sede morbi, a pulsu critico secretionis, & ut ita dicam evacuationis via determinatur. Magni inter momenti doctrinam ab Hippocratis fortasse sapientissimis observationibus depromptam proposuit, illustravitque Dominus Bordeu. Quandoquidem a pulsu tantum sedem morbi dignosci posse existimat. Nam si organa supra diaphragma, aut infra collocata causa morbosa perturbant, pulsus essentialiter differunt. Causae morbosae capiti, faucibus, pulmonibus, aut cordi haerentes pulsum eff

ciunt superiorem. Pulsus superior distinguitur faciliore observatione, duritie scilicet, magnitudine, & peculiari irritatione. Si organa infra diaphragma collocata essentialiter aegrotant, pulsus evadunt inferiores, nempe essentialiter parvi, profundiores, & minus resistentes. Rursum superiores, atque inferiores pulsus non modo qualitatem generalem habent, verum huic qualitati character organicus adjungitur. Ex. gr. in morbis capitis pulsus superior evolutionem insignem, peculiarem raritatem, & tarditatem habet; contra pulsus pulmonalis, quamvis superior, valde rigidus, admodum irritatus, & fere frequentissimus est. Denique in morbis cordis pulsus superior, & pectoralis semper cum magnis inaequalitatibus, summaque vibratione combinatur.

Praeter adnotatos superioris, inferiorisque pulsus generales characteres, ubicumque materia morbifica ab internis sedibus fertur ad exteriora, pulsus omnino externi redduntur. Rursum si tempore coctionis causa morbosa intropellitur, & ex. gr. renes versus determinatur, & postea oritur critica urinae evacuatio, tunc pulsus renales, atque vesicales erunt. Inde nascuntur pulsus critici compositi, qui non debent cum compositis diversae naturae, nempe cum pulsibus non criticis confundi. Quemadmodum per tria magis emunctoria essentialia evacuantur organa superiora, scilicet pulmones, fauces, & nares, hinc pulsus superiores critici vel sunt pectorales, vel guttu-

rales, vel nasales; sed nos saepissime videmus
 pulsum nasalem, a quo in vehementi capitis
 dolore haemorrhagiam futuram indicamus. Quia
 propter pulsum hic non solum in externis sed
 et in internis collectas substantias evacuari debere in-
 dicat, sed est etiam pulsus criticus in variis
 capitis affectibus. Pulsus pectoralis simplex est
 mollis, plenus, dilatatus, pulsationes aequales
 sunt, attamen undulatione quadam distinguun-
 tur, siquidem arteriae diastoles duplici tempore
 sculo absolvitur, verum cum magna mollitu-
 dine, mitique oscillatione, quae huic pulsui
 omnino peculiaris est. Pectoralis modo descri-
 ptus pulsus versus terminum catarrhi suppura-
 ti, pleuritidis, atque morborum, in quibus
 per metastasim pulmones noxia materia replen-
 tur, frequenter observatur. Crisis, quae ab
 hoc pulsu indicatur, est expectoratio, cujus
 opera pectus liberatur, & pulsus naturalem
 constitutionem acquirit. In hoc casu cum no-
 stro Auctore sentiendum, atque omnia medi-
 camenta evacuantia, uti sanguinis missiones,
 ac vehementiora cathartica prorsus ablegari
 debent. Gutturalis pulsus pectorali magnopere
 analogus est, evolutus, reduplicatus, & vehe-
 mens, uti sunt omnes pulsus superiores, attamen
 durior, neque adeo plenus, ac pectoralis.
 Crises, sive excretiones judicatoriae, quae a
 glandulis faucium, & praesertim tonsillis obti-
 nentur, a pulsu gutturali indicantur. Saepissi-
 me vero hic pulsus cum nasali, aut pectorali,
 frequenterque etiam cum pulsu irritationis
 con-

conjungitur. Memini non raro me vidisse hanc pulsus omnino gutturalis speciem in angina inflammatoria tempore suppurationis. Pulsus vero gutturalis simplex, aut compositus nihil aliud est, nisi pulsus resolutionis, vel perfectae suppurationis. Inter emanatoria, quae frequenter non solum maximam, verum etiam diversorum humorum copiam emittunt, primum meretur locum nasus, a quo inter cetera in valde auctis inflammatoriis, atque etiam putridis febribus sanguis evacuatur, & modo salutarem, modo lethalem crism gignit. Pulsus vero nasalis fere semper complicatus cum pulsu irritationis est, reduplicatus, uti praecedens, levior tamen, durior, vehementior, & celerior evadit. Hujusmodi pulsus a Solano dichrotus juxta Galenum dicitur, atque habetur pro certo haemorrhagiae nasalis signo, quamvis non raro critica haec evacuatio evanescere soleat, & tunc vel caput gravatur, vel cutanei morbi ob causae transpositionem oriuntur. Varietatem quoque pulsus nasalis critici adnotavit Auctor in evacuatione copiosi muci post saevissimum catarrhum; tunc ait reduplicatio in eodem ictu debilior est, pulsusque videtur minus durus, quam dum simplex haemorrhagia expectatur. Ad descriptum modo pulsus, nempe ad superiorem pertinere videtur pulsus sudoris critici; nam semper superveniente sudore facies rubra evadit, atque in partibus superioribus insignis calor accenditur. A Galeno appellatur undulans, atque undosus.

A Solano dilucide describitur, componiturque pulsationibus mollibus, atque evolutis. Juxta sententiam D. Borden pulsus sudoris critici valde analogus est pulsui pectorali, & profecto aegrotantes saepe sudore, atque expectoratione afficiuntur. Morbi omnes cutanei eruptivi eodem pulsu, sed magis duro, atque aspero distinguuntur, uti evenire videmus in variolis, morbillis, atque erysipellate.

Organa excretoria, quae infra diaphragma in abdomine collocantur, numerosa sunt; ad sunt enim in hac cavitate stomachus, hepar, intestina, renes, vasa haemorrhoidalia, atque uterus in feminis. Aegritudines harum partium in genere a pulsu inferiori, peculiariter vero a pulsu organico determinantur. Stomacho laborante, vitiosisque humoribus referto, natura crism per vomitum molitur; haec vero evacuatio notabilem gignit in arteria tensionem cum frequenti intermittencia, quemadmodum Solanus tradidit. Verum intermittencia ostendit pulsum ventriculi esse complicatum cum pulsu diarrhoeae criticae. Genuinus tamen stomachalis pulsus vomitum indicans est inter omnes criticos pulsus minus evolutus, atque leviter inaequalis, si cum reliquis inferioribus comparatur. Arteria in hoc casu rigida est, duriuscula, & vibrans, pulsationes fere aequales quoad intervalla absolvit. Observatur autem saepe in morborum humoralium initio, atque statum irritationis adesse declarat. Ab observatione pulsus stomachalis diligens Medicus

cus emetici exhibendi necessitatem animadvertit ; observatur enim , quod evacuato ventriculo pulsus elevatur , largior , molliorque redditur . Huic vero observationi praesertim innotendum , dum post vomitum spontaneum pulsus stomachalis adhuc immutatus superest , tunc medicamento emetico propinato , *natura quo vergit , eo ducere oportet* , siquidem hoc procul dubio fit per loca convenientia . Intestina multorum morborum causas continent , variis criticis evacuationibus subjiciuntur : dum vero evacuari debent , peculiarem in pulsu mutationem inducunt ; haec autem mutatio pulsum intestinale constituit . Est pulsus hic magis evolutus , quam pulsus ventriculi ; pulsationes vehementes , & rotundae majorem habent inaequalitatem in dilatatione , sive diastole , quam in intervallis micationum ; tres autem admodum inaequales , celeriores , ac profundiores pulsationes reliquis magis aequalibus succedunt . Cum irregularitatibus intermittentiae saepe conjunguntur , nunquam vero pulsus intestinalis adeo plenus , atque adeo evolutus est , ac pulsus superior ; imo magis inaequalitatibus , nulloque ordine in pulsationibus distinguitur . Ad prognosim valde conducit pulsus intestinalis perfecta intelligentia ; nam in acuto morbo si pulsus evadit inferior , si parvus , simulque incerto tempore intermittens est , tunc spontanea diarrhoea expectanda , aut lenioribus cathartici procuranda . Si cum diarrhoea critica acuti morbi solutio accidit , fere semper hoc in ca-

su intermittentia occurrit; sed in ipsis acutis
 deest aliquando haec pulsus conditio, quae de-
 sideratur etiam in diarrhoea pertinaci, & phthi-
 sicorum alvi profluvio, quamvis non raro in
 chronica diarrhoea observari soleat. Praecipuum
 hepatis officium est bilis secretionem absolvere;
 quod si secretio haec vel retardatur, vel in-
 terrumpitur, aut canalium, ductuumque bilia-
 rium lumina obstructione intercipiuntur, tunc
 hepar generali obstructione afficitur. Morbi
 quamplurimi inde oriuntur, & praesertim na-
 scitur icterus, in quo manifesta, & morbosa
 bilis redundantia, atque in loca non propria
 effusio observatur. Ubicumque hepar obstructio-
 ne, inflammatione, aut suppuratione laborat,
 pulsus dexter peculiarem mutationem nancisci-
 tur. IctERICI enim pulsum habent magnopere
 angustum, rigidum, & obscurum, qui tamen
 dilatatur tempore evacuationis criticae. Verum
 pulsus inter se aequales totidem succedunt pul-
 sationibus aequalibus, & naturalibus. Quando
 per urinae vias morbi causam natura evacuare
 molitur, tunc renes insigniter exercent actio-
 nem, quae a pulsu dignoscitur. Pulsus rena-
 lis, sive urinarius magnopere convenit cum
 intestinali, suasque enim pulsationem inaequa-
 les habet; in hac vero irregularitate regulari-
 tas quaedam observatur, quae deest in pulsu
 intestinali. Pulsationes itaque quoad propriam
 vim sensim imminuuntur, & sepeliuntur, eo-
 demque ordine rursus elevantur: opponitur
 denique pulsui intestinali, quia pulsationes ma-
 gis

gis evolutas, amplioresque absolvit. Frequenter in chronicis praesertim morbis, atque etiam in sanis hominibus venae haemorrhoidales exterius intumescunt, atque apertae atrum sanguinem emittunt. Haec evacuatio, quae peculiarem hepatis, lienis, vesicae, & uteri etiam in mulieribus, aut simplicem plethoram, aut obstructionem, aut pressionem a tumore aliquo abdominali obortam supponit, accidit semper cum insigni molestia. Siquidem dum fluxus haemorrhoidalis instat, aegritudines nascuntur, quae stomachum, & caput perturbant, quia de critica evacuatione agitur: fluxu desinente omnia evanescent accidentia. In venarum haemorrhoidalium ruptura arteriae magnopere mutantur; est autem pulsus hoc tempore inaequalis, sed simul reduplicatus, pulsationes inter se non admodum similes sunt quoad vehementiam, & quoad intervalla; semper autem tribus, aut quatuor pulsationibus concentratis, vehementioribus, rigidis, fere aequalibus tres ampliores quasi rotundae, & minus aequales succedunt: rursus tres, quae sequuntur, pulsationes cum undositate, & regurgitatione absoluntur. Verum in descriptis pulsationibus fere semper deprehenditur tremoris species, major frequentia, majorque durities, quam in reliquis pulsationibus inferioribus. Percipitur demum profunditas quaedam cum tremore conjuncta, quae magis notabilem differentiam constituit inter haemorrhoidalem, & pulsum menstruae evacuationis.

Inter criticos fluxus recenseri debet sanguinis menstrui effusio, quae per vaginam absoluitur: pulsus ante hoc tempus peculiariter mutatur, atque hanc criticam evacuationem praenunciat. Est excretorius reduplicatus, dichrotus, haemorrhoidali simillimus; etenim evadit inaequalis, irregularis, regurgitans, sed magis evolutus, largior, exterior, non admodum profundus, neque durus. Observatur frequentius in virginibus, cum primum menstrua incipiunt, atque in proVectiori aetate, dum haec evacuatio uterina imminuitur. Alio in morbo uteri ipsius, nempe in fluxu albo idem pulsus, sed mollior deprehenditur. Adnotatis usque adhuc criticorum peculiarium pulsum differentitiis Cl. Bordeu pulsum criticum generalem, nempe pulsum suppurationis adiecit. Nam si dolore in aliqua externa existente parte arteriae observantur, pulsus primis diebus rigidus, & convulsivus reperitur, postea expanditur arteria cum considerabili etiam rigiditate, quae per certum tempus substat. Si vero post suppurationem pulsus mollis, atque undosus evadit, criticus est, semperque characterem habet organicum, atque emunctorium, a quo evacuatio absolvi debet, manifeste indicat. Neque cum vulgaribus hominibus suppuratio pertimescenda, atque medicamentis avertenda; nomine enim suppurationis concoctio, ac separatio humorum vitiosorum a salutaribus intelligitur. In morbis tamen acutis suppuratio a coctione proprie dicta differt

tan-

tantum quoad locum ; nam si ex. gr. sanguis
 vitiosas , morbosasque , quas continet , particu-
 las tempore critico ad exteriora mittit , atque
 tumor cum suppuratione gignitur , haec erit
 critica morbi judicatio ; contra si vasa , quae
 morbofo humore , nempe causa morbifica re-
 plentur , post debitum tempus per propria
 emunctoria , utpote nares , pulmones , renes ,
 atque intestina causam omnium symptomatum
 emittunt ; haec mutatio , quae suppurationis
 species est , peculiari coctionis , & cricum no-
 mine designatur . Febris itaque , cujus opera
 tantae utilitatis operationem natura molitur ,
 est virium vitalium procul dubio conamen ,
 quo animalis vis interna materiam morbificam
 eliminare conatur . Ideo accidit , ut multae
 chronicae aegritudines , quae absque febre sunt ,
 diutius sustineantur , & superveniente febrili
 motu more acutorum morborum facile , atque
 perfecte judicantur . Crises post coctionem eve-
 nientes , uti supra innuimus , dignoscuntur a
 diverso pulsuum caractere ; hinc dum coctio
 absolvitur , naturaeque opera crisis paratur ,
 tunc ab omni medicamento , aut antifebrili
 aut vehementer cathartico abstinendum . Medi-
 cus enim Hippocraticis doctrinis inniti debet :
 primo enim Hippocrates scribit : *Dum morbus*
viget , melius est quietem habere ; vigor enim
morbi est tempus coctionis . Secundo ait : Con-
cocta medicari , atque movere oportet , non autem
cruda , neque in principiis &c. Igitur a perfecta
 pulsuum scientia peritus Medicus videbit , num

Febris
 definitio .

Tem-
 pore
 critico
 absti-
 nen-
 dum a
 medi-
 camen-
 tis .

ad medicamenta deveniendum sit, vel ab omnibus pharmaceuticis praesidiis abstinere oportet. Quae usque adeo persecuti sumus, respiciunt tantummodo pulsus criticos simplices, qui tamen raro observantur; quandoquidem non unius solum organi aegritudines deprehenduntur; & rursus in omnibus morbis non unius organi actione, sed multorum conspiratione, & consensu natura crism molitur. In hoc itaque casu pulsum compositorum intelligentia praecipuam primo morbi sedem, & deinde aliarum quoque partium per consensum affectarum conditionem nobis ostendit. Coniunguntur itaque varii pulsus superiores inter se, combinantur cum intestinali, & cum variis speciebus pulsus inferioris. Pulsus pectoralis cum pulsu sudoris combinatur, atque diversae haemorrhagiae pulsus magnam inter se analogiam habent. Compositus si adest pulsus, duplex erit expectanda crisis, quod quidem ab observationibus deducitur. Multa denique a clarissimo Borden adnotantur de ratione, qua pulsus sunt explorandi, ac multae proponuntur regulae generales, quae a nobis ob temporis angustiam praetermittuntur.



C A P U T I.

De Pulsibus particularibus.

CUM Praxi Clinicae sedulo annis superioribus operam dare coepissem, quæ Cl. Viri de pulsuum natura, & characteribus tradiderunt, diligenter investigare pro virili conatus sum. Sed aliorum observationibus intentus innumera & mihi natura monstravit ad artem sphygmicam pertinentia, quæ quia aliquam vobis utilitatem, atque fortasse non parvum aegrotantibus emolumentum afferre posse existimavi; ideo oculis vestris subjicienda esse censi. Primo itaque nonnullas generales pulsuum qualitates, deinde peculiarium pulsuum luculentissima, & essentialia attributa proponam. Recte a Sinenſibus pulsus dividuntur in externos, & internos; hinc quid sit externus, & quomodo distinguitur internus, propriis observationibus innixi hoc in loco declarare conabimur.

Externus pulsus dicitur ita, quia dum carpi arteria tangitur, digiti statim amplissimam perſentiunt diaſtolem; hæc vero dum causa morbosa ad coctionem pervenit, non solum amplior, sed simul mollis est; tempore contra irritationis, siue cruditatis arteria externa, attamen magis rotunda, durior, magis

Pulsus
exter-
nus.

rigida est. Varia hinc sunt pulsus externi attributa, variisque in morbis haec arteriae conditio observatur. Primo enim cutaneae omnes infirmitates, quae acutae sunt, scilicet cum febris conjunctae, uti erysipelas, variola, rubella, & scarlatina, in principio pulsum habent durum, & concentratum, atque hoc tempore de interno calore aegri conqueruntur; sed dum materia morbosa ad externas sedes fertur, pulsus quamvis durus, attamen externus, & fere semper aequalis usque ad perfectam morbi evolutionem deprehenditur. Hoc pulsu distinguuntur etiam pleuritis, rheumatismus, cephalalgia, tumores omnes inflammatorii loca externa occupantes, & vulnera recentia. Denique eodem pulsu gaudent, qui podagra, bubone venereo, aliisque ejusdem morbis generis afficiuntur. Id quod essentiam, atque utilitatem hujus pulsus ostendit, est quod semper affectae, inflammatae scilicet, dolenti, aut vulneratae parti respondet, quapropter sedes affecta statim dignoscitur. Hinc dolor capitis parte dextera perturbans dexteri brachii pulsum magis externum, attamen durum, ac vehementem reddit. Si dolor capitis cum pulsu externo conjunctus pendet a coryza, pulsationes primis diebus rigidae, & inaequales deprehenduntur; sed morbo ad coctionem vergente pulsationes molliiores, atque undosae evadunt. Ab erysipelate in sinistra colli parte existente, atque versus aurem sinistram diffuso pulsus respondentis lateris magnus, durus, & externus est; alter ve-

ro manifeste minor, & parvus ad proxime naturam accedit. Attamen in quocunque erysipellate pulsus dexter semper inferior, parvus, atque stomachalis deprehenditur, quia erysipelosa bilis degeneratione, & ventriculi aegritudine ortum ducit, quemadmodum inferius patebit. In maximis doloribus, atque post saevissimas chirurgicas operationes pulsus parti affectae respondens valde coarctatus, parvus, irritatus, convulsivus, atque internus redditur, quod quidem accidit ob nimiam doloris intensitatem; nam post duodecim horas arteria admodum externa, ac vehemens evadit. His positis non solum sedes affectae a pulsuum caractere dignoscuntur, & determinantur; verum etiam praesagire, aut judicare Medicus potest, num de periculo, vel contra de morbo innoxio, & tantum depuratorio agatur. Etenim ubicumque pulsus externus observatur, morbum externam, idest minus nobilem sedem occupare certissimum erit; tunc de morbo aliquo organico, & essentiali nulla erit suspicio. Hoc absolute demonstratur, si considerantur accidentia morbis externis cum externo pulsu conjunctis supervenientia. Et sane erysipelas usque dum inflammationem manifestam in quacunque exteriori corporis sede gignit, atque cum pulsu externo, vehementi, magno, atque carnoso copulatur, omni periculo vacat; & erysipellate statim evanescente cum pulsu interno pectorali, aut capitali, tunc causa inflammationis ad essentialia organa fertur, morbumque efficit

periculosissimum . Idem accidit in variolis in perfecta eruptione , aut pustularum extricatione , purisque resorptione . Hujus mutationis varias species observavi , & omnia in Commentariis adnotavi . Ubicunque morbi cutanei vel solutione , vel suppuratione , & praesertim mediante sudore critico judicantur , pulsus externus , mollior , atque undosus fit ; siquidem post tres pulsationes plerumque profundiores quarta exsurgit amplissima , fere tremula , vel potius in tam longa arteriae dilatatione infirma , & vacillans . Pulsus externus criticus saepenumero confunditur cum pulsu suppurationis , de quo infra differendum . Nonnullos deinde habemus morbos organicos internos , in quibus tamen pulsus omnino externus videtur ; ex. gr. in aneurysmate magnarum arteriarum pulsus est vehemens , vibratus , durissimus , attamen inaequalis , saepissimeque intermittens . Hic tamen pulsus rigiditatem pulsus pectoralis , non autem externorum pulsum molliitudinem , & carnosam naturam habet . Mutatur vero insigniter aneurysmaticorum pulsus in morbi maximo incremento , & arteriae fiunt parvae , internae , admodum inaequales , incredibilem frequentiam , summamque celeritatem nanciscuntur . Memini me pulsationes 264. unius minuti primi tempore observasse in praecordiorum aneurysmate . Cum externis pulsibus adauctus semper corporis calor deprehenditur : hinc vitae vim majorem esse intelligimus , atque ab hoc signo morbum periculo vacare judi-

dicamus; quandoquidem dum aegri in morbis malignis, atque venenorum actione ad interitum vergunt, imminuitur calor, atque pulsus fiunt interni, parvi, atque lethales. Quapropter si post secundum septenarium, atque etiam post evacuationes aut alvinas, aut cutaneas pulsus parvi, obscuri, atque interni redduntur, & simul externus calor imminuitur, malum. Nunquam vero pulsus, a quo crisis expectatur, confundi debet cum pulsu exteriori fallacissimo, cujus vel integra corporis sideratio, vel gangraena partis alicujus apparentiam assumit per certum tempus, calorem mentitur, & postea admodum interna, & lethalis redditur. Fateor me hac apparentia deceptum fuisse in maligno colli anthrace, atque in peripneumonia. Itaque hoc in casu pulsus 24. horis, aut 48. ante mortificationem, vel perfrigerationem universi corporis elevantur, ampliores, & fere undosi redduntur, & Medicus magnam diastolem animadvertens morbum ad salutem pergere pronuntiabit. Veruntamen deest in pulsu insignis illa resistentia, & durities, quae pulsum externum peculiariter a reliquis distinguit, & arteria potius vacua videtur. Postridie parvi, languidi, internique pulsus evadunt. Hinc nos nunquam gangraenam absolutam esse judicabimus, dummodo pulsum elevatio, & magnitudo observabitur. Memorata superius observatio circa gradum caloris adauctum in pulsu externo apud Sineses praecipuam constituit differentiam inter pulsus externos, atque in-

internos, nempe salutare, & periculosos. In chronicis morbis, praesertim vero in tumoribus strumosis, in spermatocele, hydrocele, aut hydrofarcocoele pulsus magis externus, vehemens & semper inaequalis observatur, praesertim in brachio parti affectae respondens. Attamen differunt inter se pulsus externi in adnotatis morbis juxta partium affectarum diversitatem, quemadmodum in descriptione pulsuum peculiarium demonstrabitur. Opportunum denique erit quaedam ad pulsus externos pertinentia ab aliorum Cl. Virorum scriptis deprompta in medium afferre. Vallesius itaque in Commentariis ad lib. V. Epid. n. 57, ubi Hippocrates historiam hominis lapide percussi narrat sequentibus verbis : *Cui caput lapide percussum est a Macedone, cecidit ; tertio sine voce erat, anxietas, febris tenuis, non valde in temporibus erat pulsus, nihil audiebat, neque cupiebat non sine tremore ; sed quarto movebatur : humiditas circa frontem, & sub naso usque ad mentum, & mortuus est.* Igitur dum periculosum morbum describit magnus Hippocrates, pulsus non externum, sed internum adnotavit. Ad haec Vallesius : febris vero apparebat tenuis, & pulsus in temporibus non valde inerat, quod affectio interna esset, & per internas arterias, & venas potius quam per externas fluxio reciperetur ; contra vero in virgine Nerei factum esse dicebamus. Et Galenus dum differentiam inter erysipelas, atque genuinam inflammationem instituit, de externo, atque interno pulsu

su loquitur : quin etiam ait : *Et pulsus magnae inflammationis est symptoma ; etenim & in profundo corporis fere nascitur, uti & erysipelas in cute magis, quam in profundo consistit.*

Non solum ob organi essentialiter affecti naturam, atque officium, verum etiam ob virium vitalium defectum, nervorumque debilitatem pulsus, amissa naturali vehementia, & validitate, deprehenduntur, atque interni redduntur ; siquidem etiam absque peculiari morbo organico simplex humorum dissolutio, ac generalis sanguinis phlogisticatio, aut alcaliscentia pulsum gignit languidum, parvum, atque internum. In peculiari artuum gangraena, atque praesertim in mortificatione, qua integra fere sura corrumpebatur, pulsus parti affectae respondens parvus, tardus, atque internus in peculiari casu apparebat. Magis vero pulsus interni character declaratur, dum agitur de morbis inum ventrem occupantibus, quemadmodum experti sumus in tumoribus mesenterii, omenti, & nuperrime in maximo hepatis scirrho, in quo paucis ante mortem diebus pulsus dexter omnino evanuerat. Hinc si in chronicis morbis, in quibus vel de tumore, vel de obstructione, aut de ulcere vitioso suspicio est, pulsus fiunt debilissimi, atque tangentium digitis instar subtilissimi fili occurrunt, de aegri rebus semper desperandum. Neque magnopere interest, num frequentia absit, quae est febris abientia ; nam hydropici tabe confecti, homines, qui nimia stomachi debili-

litate vexantur ; & qui syncope afficiuntur pereunt absque motu febrili, dummodo pulsus evadat internus. Hujusmodi tamen praesagium moderari debet in morbis simpliciter convulsivis ; in hisce enim casibus plerumque pulsus interni a contractione praeternaturali oriuntur. Verumtamen in convulsionibus arteriae quamvis parvae, atque depressae, peculiari tamen duritie donantur. Malum, ac prorsus lethale est in aneurysmaticis pulsus externum, & vibratum in parvum, celerrimum, atque internum mutari. Pessimum etiam est in acutis morbis pulsus internus observare ; a tribus etenim causis oriri potest, scilicet aut a nimia totius corporis debilitate post longam defatigationem, aut a sanguinis dissolutione, vel denique a visceris alicujus perfecta mortificatione. Saepe in malignis febribus videmus pulsus morbi integre fieri internum, verum sine ulla pulsationum inaequalitate quoad quantitatem dilatationis, atque vehementiam ictuum. Hoc autem oritur a magna irritabilitatis, & vitalitatis imminutione. Sed dum hepar insigni morbo afficitur, pulsus fiunt parvi, celerissimi, frequentissimi, insigniter inaequales, atque interni. In omnibus siquidem morbis organicis pulsuum parvitas periculosum signum constituit. Atque ut generali definitione pulsus interni characterem complectar, internus pulsus ille est, in quo arteriae admodum parvae diameter moderatae pressioni statim cedit atque absconditur. Verum in aegro morti pro-

Pulsus
inter-
nus.

ximo tardissimus, atque intermittens deprehenditur. Observatur constanter in morbis cordis minime adauctis, in gangraenis, & inflammationibus internarum partium, in hepatitide, colica convulsiva, & similibus, ac, denique omnium organorum statum designat.

Corollarii loco valde necessariam reddere conabor descriptionem pulsus suppurationis. Haec autem uberrima erit; nam generali nomine comprehenduntur pulsus eruptivi inflammationum localium, & praesertim erysipelatis, pulsus sudoris, & haemorrhagiae; etenim ad pulsum externorum classem procul dubio pertinent. Magna profecto animadvertitur analogia inter pulsus morbillorum, variolarum, erysipelatis, critici sudoris, & tumorum omnium non solum tempore suppurationis, verum etiam in statu cruditatis, & saepenumero dum nullus febrilis motus animadvertitur. Ejusdem naturae pulsus observantur in febrium intermittentium declinatione, atque in ulcerum suppuratione. In genere itaque pulsus suppuratorius est semper externus; minima enim adhibita pressione magna pars diametri arteriae occurrit, atque mobilitas quaedam, sive potius obscurus tremor in diastole adnotatur. Hinc semper pulsus hic exterior, irregularis, sive inaequalis erit. In cutaneorum principio morborum, & magis in ipsa febrium exacerbatione nulla reperitur arteriae amplitudo; siquidem ob spasmodicam solidorum contractionem pulsus quamvis externus, & facile observabilis, attamen

rigidus, & angustus evadit. Rursum tanta effectus frequentia, atque celeritas, dum febris evolvitur, ut inaequalitas in magnitudine ictuum, quae essentialem hujus pulsus characterem constituit, nequeat determinari. Tertianarum ideo, & quartanarum, erysipelatis, morbillorum, & variolarum pulsus in principio potius duri, rotundi, admodum resistentes, & externi sunt, explicato tamen, & evoluto febrili paroxysmo, tanta est copia fluidorum, quae ad vasa cutanea feruntur, tantoque impetu circulationi progreditur, ut arteriae pulsationes similes inter se aequales, atque uniformes fieri nequeant. Tunc inaequalitas antea abscondita animadvertitur; imo potentiissima redditur, quia tempore coctionis, & crisis solidae partes summo opere relaxatae parvam resistantiam circulationi opponunt. Quemadmodum vero de intermittentibus febribus sermo incidit, peculiaris observatio debet adnotari. In hujusmodi enim periodicis affectibus tempore perfectae intermissionis, sive apyrexiae, atque octo, aut decem ante novum paroxysmum horis pulsus elevatur sine frequentia, durus fit, rotundus, atque vibratus; hoc autem certissimum est proximae febrilis exacerbationis signum. Haec arteriae rigiditas sine inaequalitate in principiis manifesta observatur in omnibus febribus a suppuratione, aut ab ulcere provenientius. Etenim phthisicorum haec febris post prandium superveniens pulsum affert rigidum, cujus vitiosa contractio superest usque ad perfectam paroxys-

xysmi evolutionem ; tunc inaequalitates deprehenduntur . In constitutionibus variolarum , & morbillorum , dum morbus in vigore est , aegrotantium omnium pulsus eruptivum externum characterem magis observant , quia componuntur tribus , aut quatuor aequalibus , & moderate elevatis pullationibus , quibus succedit unus ictus amplior , magis elevatus , & fere semper mollior . Deservescente causa generali , atque imminuto impetu circulationis , pulsus facile ad naturalem aequabilitatem redire solent . In morbillo praeter pulsum externum eruptivum , nempe inaequalem , & post tres , aut quatuor ictus undosum , irritatio insignis , major angustia , & frequentior inaequalitas in arteria dextera deprehenditur . Nam morbillosi faucium inflammatione , & molestissima tussi perturbantur . Hinc pulsus modo descriptus nempe gutturalis , & pulmonalis semper observatur . In omni erysipellate dum cutis in aliquo peculiari loco a causa morbosa inflammatur , eruptionis tempore erit primo durus , externus , atque raro aequalis ; absoluta deinde eruptione permanet inaequalitas , magis manifesta evadit , atque arteria simillima est pulsui sudoris critici . Lateris affecti pulsus hac qualitate ut plurimum eminent , quod verum est de omnibus localibus morbis , qui a pulsu affecti lateris saepenumero indicantur . Hoc autem confirmatur vulgari exemplo emplastri vesicatorii ; si enim dextero brachio vesicatorium applicatur , arteria carpi dexteri primo pulsum

efficit irritatum, ac valde concentratum, postea undosas, tremulas, & inaequales pulsationes absolvit. Verum quemadmodum erysipelas nunquam a bilis degeneratione, stomachi vitio, & vomitu spontaneo in principiis sejungitur, ideo primis praesertim diebus arteriae dexteræ pars media valde parva in minimum arcum elevatur, & pulsus stomachalis characterem constituit. Peculiari etiam adnotatione digna videtur observatio hujusce pulsus suppuratorii in aegritudine externa non febrili, utpote hydrosarcocele, tumore scirrhuso, & similibus testiculorum affectibus; testiculo enim dextero, aut sinistro tumore affecto, semper pulsus brachii sinistri duriusculus, magis elevatus, vibrans, & inaequalis, oppositus vero naturalisprehenditur. Idem accidit in fluxu haemorrhoidali, & fistulis intestini recti, quemadmodum suo loco adnotabitur. Ut igitur omnia in unum redigantur, pulsus semper materiam morbosam aliquo in loco collectam indicat, simul declarat naturam magnam circulationis vim adhibere ad superandam modo majorem, modo minorem in parte affecta resistantiam. Si hujusmodi pulsus, nempe eruptivi, suppuratorii, aut resolutorii omnino externi sint, & causam morbi partibus externis haerentem indicent, tunc bonum est. Contra inaequalitas ictuum cum pulsu interno, & praesertim organico conjuncta quo frequentior, eo majoris erit momenti, & quo ictus sunt minores, & crebriores, morbus lethalis est. In
omni-

omnibus enim internis inflammationibus dum summa adest inaequalitas, quae a tremulo arteriae motu dignoscitur, lethale: quoadmodum constanter observatur in peripneumonia, & hepatide. Si contra inaequalitates rariores sunt, & arteriae minus depressoae observantur, hoc proximae crisis indicium erit.

Ab externi, internique pulsus descriptione transeundum modo ad characteres pulsus superioris, & inferioris; hujusmodi namque differentiae sedem morbi generalem in capite, thorace, aut abdomine reperiri nobis declarant. Pulsus superior, quo indicantur omnes morbi supra diaphragma existentes, ictibus constat duris, & praecipua vibratione praeditis; diastole enim cum quadam permanenti vehementia perficitur. Distinguitur primo a pulsu externo, quandoquidem in exteriori pulsu mications arteriae mollem, inaequalem, & raro duriusculam elevationem, sive amplitudinem habent. Rursum peculiaris durities, & resistantia pulsus superioris statum irritationis, causae morbosae activitatem, semperque difficultatem judicii ostendit. Acutus deinde, atque in fine diastoles vibrans pulsus superior celeritate essentialiter donari debet; etenim cum celeritas sit brevissimum integrae expansionis arteriosae tempus, ideo ut arteria celeriter dilatetur, oportet ut vehementissima sit causa illa, quae citissimam diastolem gignit. Celeritas vero cum duritie pulsus conjuncta semper in morbis acutis periculum, in chronicis summam judicii

Pulsus
superior.

difficultatem declarat . Hoc tamen luculenter
 intelligitur , si considerantur morbi peculiare
 in quibus pulsus superior observatur . Essentia
 les etenim capitis , pulmonum , & cordis affe-
 ctus a pulsu superiori dignoscuntur , ac deter-
 minantur ; & quamvis multum inter se differ-
 rant pulsus in diversis hisce morbis , semper
 tamen aut nervorum , aut sensationum , aut res-
 pirationis , aut denique in circulatorio sangui-
 nis motu insuperabiles laesiones portendunt .
 Apoplexiae , comatosi affectus , delirium , epi-
 lepsiae , gravissimae aliae capitis aegritudines a
 pulsu superiori capitali dicto distinguuntur .
 Acuti , aut diuturni pulmonum morbi pulsum
 efficiunt pectoralem , in quo arteriae semper
 superiores , vibrantes , & saepius vehementes
 peculiaria attributa inferius describenda assu-
 munt . Cordis actio in aneurysmaticis ad sum-
 mum labefactata hujus laesionis signa pulsibus
 communicat , & aneurysmata dignoscuntur a
 pulsu superiori , in quo incredibiles saepe inae-
 qualitas animadvertitur . Eadem ratione digno-
 scimus , num accidentia nonnulla morbosa , quae
 circulationem insigniter perturbant , & cordis
 molestam admodum palpitationem gignunt , a
 causa intra thoracem existente , vel contra a
 morbo abdominali , ut aliquando fieri solet ,
 ortum ducunt . Hoc uberrimis observationibus
 vermium intestinalium , quorum praesentia cor-
 dis palpitationem , & frequentissimam pulsum
 intermittentiam excitat , mox confirmabitur .
 In principiis , & vigore morborum pulsus su-

superior characteres suos integre servat, amplior, duriorque apparet, neque praecipuas inaequalitates ostendit. Siquidem inaequalitas vel gignitur ob validam, & adauctam virium vitalium actionem adversus causam morbosam, vel fit, quia deficiente valido, aequabilique cordis impetu influxus sanguinis ob solidorum resistantiam magnam perturbationem experitur, & ideo cum irregularitate perficitur. Aliquando etiam pulsationes per certum tempus omnino interrumpuntur, atque haec intermittentia characterem constituit. Intermittit profecto pulsus in magno corporis languore, atque in paroxysmi febrilis remissione; contra dum redeunt vires, & cum febris majorem nanciscitur vehementiam, statim intermissio vel penitus evanescit, vel rarior redditur. Morbi organorum intra thoracem, vel supra diaphragma existentium si aut proximam mortem, aut magnum periculum imitantur, pulsus antea superiorem, valde durum, & satis magnum, statim parvum, attamen durum, irregularemque reddunt. Ita se res habet in phthisi pulmonali, in peripneumonia, in aneurysmaticis magnarum arteriarum affectibus, atque in internis semper lethalibus capitis laesionibus. Quapropter si antea pulsus superior observabatur in memoratis morbis, atque deinde imminuta arteriae amplitudoprehenditur, aeger in magno vitae discrimine versatur. Parvitas enim arteriarum virium vitalium summam debilitatem constanter indicat. Haec de universalibus

pulsus superioris proprietatibus satis ; oportet modo , ut eadem ratione ad generalem pulsus inferioris historiam tradendam gradum faciamus .

Pulsus
inferior .

Pulsus inferioris nomine designatur arteria satis parva , non admodum resistens , neque acuta vibratione praedita , & praecipua illa celeritate , aut frequentia superioris pulsus ut plurimum destituta . Haec arteriae conditio organorum infra septum transversum existentium aegritudines nobis ostendit , atque si recte intelligitur , multum ad praesagia instituenda multumque pro indicatione curatoria conducit . Deest primo in diastole pulsus inferioris vehementia illa , validaque durities , quae superiorem pulsus constituit ; deest praecipua celeritas in singularum micationum termino , & quamvis inferior pulsus saepe frequentissimus sit , nulla tamen praeternaturalis durities in ictibus animadvertitur . In acutis ventriculi , intestinorum , aut hepatis morbis pulsus inferiores admodum parvi , tardi , rarique sunt ; quo vero periculosior morbus , eo magis parvitas , imbecillitasque arteriae augetur . Ubi cumque tamen aegritudines , quae ad imum ventrem pertinent , cum aliqua pulmonum laesione conjunguntur , statim essentialis celeritas , frequentia , durities , atque elevatio exurgit ; pulsus tamen in hisce casibus compositi evadunt , quandoquidem pulsationibus modo parvis , & inferioribus , modo elevatis , & superioribus componuntur . Attamen si aegritudo essentialis

organa abdominalia primario occupat, semper
 pulsus inferiores frequentius, constanterque
 observantur. Hoc autem hydropicorum exem-
 plo luculenter confirmatur; nam dum de ascite
 simpliciter agitur, neque aegrotantes tussi,
 aut praecipua spirandi difficultate perturbantur,
 pulsus parvi, tardi, humiles, ac debilissimi
 sunt. At contra si in morbi progressu superio-
 res cavitates aqua replentur, & praesertim si
 ob hanc causam cellulae pulmonales aut sim-
 plici aquoso latice, aut glutine replentur una
 cum spirandi difficultate, & genarum rubore,
 pulsus saepenumero elevati, duri, & vehemen-
 tes deprehenduntur. Adnotatae usque adhuc
 inter superiorem, & inferiorem pulsum diffe-
 rentiae ad crimum, sive evacuationum viam
 nobis indicandam plurimum conducunt. Siqui-
 dem pulsus sinister, in quo inferioris caracte-
 res exurgunt in morbis pectoris, diarrhoeam
 brevi futuram praenunciat; uti saepenumero
 accidit in pleuritide biliosa, quae morbus est
 in calidis regionibus frequentissimus. Dextera
 deinde arteria in carpo parva, & irritata pri-
 mariam aegritudinem ventriculi motu dissipanda
 indicat. Hepatis affectiones a depressio-
 ne, & inaequalitate partis anterioris pulsus si-
 nistri, atque a dexterae arteriae summa parvi-
 tate dignoscuntur. Evacuationes intestinales
 omnino criticae, quae cum intermittentiis con-
 junguntur, semper cum pulsu inferiori, & in-
 testinali copulantur. Uteri affectiones semper
 a pulsu inferiori diversa ratione mutato indi-

cantur . Haec tamen omnia a differentiis , & descriptionibus pulsum organicorum facile eruuntur .



C A P U T II.

De Pulsibus Organicis .

MOrbi omnes non modo acuti, verum etiam chronici in duas generales classes merito distinguuntur . Prima simplicem humorum intemperiem, sive fluidorum tantummodo degenerationem, & morbos inde provenientes complectitur . Altera organorum viscerum interdum obstructionem, interdum vero inflammationem, & suppurationem respicit . In priori casu a pulsibus generalibus externis, ac praesertim criticis diversae, quae evenire debent, vitiosarum substantiarum egestionem indicantur; in secundo diagnosis a pulsibus organicis omnino deducenda est . Hinc post adnotatas externorum, atque internorum, superiorum, & inferiorum pulsum qualitates, videndum modo, qua ratione organici affectus a varia arteriarum pulsatione dignosci, ac recte determinari possint . Diversa itaque corporis humani organa novas pulsum definitiones, ac differentias nobis suppeditabunt .

Pulsus Capitalis.

Organa, quae in suprema corporis parte collocantur, si praeternaturalem perturbationem patiuntur, statim peculiarem in pulsibus mutationem gignunt; contra vero, quae ad viscera abdominalia pertinent aegritudines, diversa ratione pulsus efficiunt. Et sane dum organa, quae calvariae cavitatem occupant, morbo aliquo afficiuntur, pulsus capitalis exoritur. In genere capitalis pulsus constat arteria superiori, quae fere semper vehementem, magnam, sed tamen valde obtusam diastolem absolvit. Pulsationes rursus tardae, atque omnino rarae sunt, aliquando majorem, saepe minorem habent dilatationem. Distingui tamen inter se debent pulsus, qui in diversis generibus morborum capitis occurrunt. Apoplecticorum primo pulsus tardus, & rarus, ut plurimum vehemens, durus, in fine diastoles obtusissimus est, ac raro aut inaequalitate, aut intermittentiâ afficitur. Semper haec pulsum conditio in apoplexia mere sanguinea observatur; imo aliquando si convulsivus affectus in sanguineam apoplexiam transit, tunc pulsus primo vehementes per gradus evadunt interni, tardi, atque profundissimi. Hoc praesertim signo apoplexia convulsiva, aut lymphatica a sanguinea distinguenda erit. In lymphatica enim arteriae tardae, ac rarae, ut in apo-

ple-


plecticis omnibus, tamen adeo profundae, internaeque sunt, ut nisi adhibeatur compressio valida, animadverti nequeant; simulque circulatio tenacissimo glutine comparari potest. Epilepticorum pulsus, uti apoplecticorum superior est, durus, rarus, atque tardus tempore paroxysmi; nam remittente morbi intensitate, dum sanguis facilius per vasa capitis fertur, arteriae vehementiam, & vibrationem amittunt, plerumque inferiores fiunt, & inaequalitatem illam assumunt, quae in sanis etiam hominibus post somnum observatur.

Morbi maligni febriles, qui cum lethargo, aut delirio conjunguntur, raro pulsum absolute capitalem efficiunt, si causa morbifica viscera abdominalia occupat, & caput non idiopathice, sed sympathice laborat. In hisce tamen casibus arteriae durissimae, & nervosae pulsationibus modo vehementioribus, & capitalibus, modo parvis, & inferioribus componuntur. In delirio praesertim pulsationes quamvis non adeo magnae, uti in capitis morbis essentialibus, durissimae tamen, & admodum vibrantes sunt. Lue venerea affecti homines ob diuturnitatem morbi saepissime tumoribus, & nodis in capite vexantur, atque frequentius in regione frontali suppurationes profundae cum ossium carie eveniunt: hoc in casu pulsus sunt summopere externi, vehementes, elevati, duri, & inaequales, quia aut imminet, aut absoluta est suppuratio. Etenim ubicumque pulsatio unica vehementer post tres, vel quatuor

re-

regulares ictus oritur , de abscessu , & suppuratione dubitandum . Si tumor in dextera , aut sinistra capitis regione collocatur , pulsus parti affectae respondens est semper magis durus , & contractus , majorique vibratione donatus , praesertim ante suppurationem . Dolores capitis ab eadem causa provenientes , & qui nocturno tempore exacerbantur , si internas capitis sedes primario perturbant , pulsum efficiunt superiorem quidem , sed minime externum , sive elevatum , durum , & vehementem , contra vero arteria etsi satis magna , admodum tamen obtusa versus finem diastolis redditur . In memoratis casibus sopore , lethargo , aut comate accedente suppurationem in ipsa cerebri substantia jam factam esse judicandum erit . In cadavere siquidem hominis hoc morbo extincti insignem cerebelli abscessum observavimus . Saepenumero etiam in hac aegritudine pulsus dexter magnopere deprimitur , quia ob capitis affectum vomitus quotidie excitatur . Quemadmodum morbi ab utero pendentes , ac praesertim lethales illae febres , quae in puerperis ob lactis retropulsionem nascuntur , numquam sine comatoso affectu , & raro absque fatali ophthalmia eveniunt . Attamen contrarium saepenumero accidit , quia causa essentialis morbi non caput , sed sedes inferiores occupat . Pulsus hinc parvi , celeres , frequentissimi , atque inferiores sunt ; nonnulli tamen ictus magis elevati , & inaequales comatosum affectum indicant . Mulieres etiam , quae ante periodicam

cam sanguinis uteri evacuationem acuto capitis dolore frequenter perturbantur, nunquam pulsum habent absolute capitalem; siquidem arteriae satis contractae, & irritatae semper inferiores, & uterinae sunt, quemadmodum inferius declarabitur.



Pulsus Gutturalis.

Ubi fauces aegrotant, atque vel generali inflammatione, vel peculiari tonsillarum tumore laborant, plerumque febris satis molesta excitatur; tunc pulsus fiunt superiores, magni, vehementes, & magis dilatati, atque praecipuas, sed inordinatas inaequalitates habent. Inaequalitates hujusmodi, si durae sunt, statum irritationis, sive initium morbi ostendunt; contra si magis undosae, & molliores evadunt, suppurationem in faucibus jam absolutam esse declarant. Brevior capitali est gutturalis pulsus, neque acutam duritiem arteriae pectoralis habet; brevitatem vero versatur in minori dilatatione, sive minus protracta diastole. Peculiariter vero in epidemicis faucium, & tonsillarum inflammationibus in hoc pulsu semper elevatio dura primo, & cum irritationeprehenditur; postea magis undosae pulsationes nascuntur. Siquidem spuria suppuratione morbus terminatur, quemadmodum in praxi frequenter observavimus. Praecipuus tamen cha-

ra-


rafter, quo gutturalis pulsus a capitali, & pectorali distinguitur, est brevitās, sive concentratio arteriae cum pulsationum irregulari, scilicet inordinata inaequalitate conjuncta. Animadvertendum rursū quod pulsus gutturalis parti affectae respondens semper valde irritatus, durusque sit tempore cruditatis, postmodum vero in simplici coctione, aut genuina suppuratione evolvitur, retardaturque, atque ictus habet molliores. Dum frequentia cum celeritate imminuitur, semper de proximo, bonoque morbi judicio certi sumus, si vires, ceteraeque corporis actiones debitam valetudinem resumunt. Nam saepissime accidit, ut deficiente ob proximam mortem, aut internarum partium necrosim febrili motu ab imperitis de feliciſſimo morbi successu pronosticum instituat. Ex superioribus eruitur, quod in angina inflammatoria pulsus gutturalis modo descriptus observari, nobisque aut simplicem inflammationem, aut perfectam suppurationem declarare debet. Attamen si cum angina stomachi aegritudo nempe vitiosa pravorum succorum saburra conjungitur, hoc semper a pulsu dextero, parvo, irritato, & inferiori dignoscitur; interim in opposita nempe sinistra arteria gutturalis pulsus manifesta signa reperiuntur. In sola tamen ulcerosa, sive gangraenosa, & vere maligna angina, quae in septentrionalibus regionibus frequentissima est, pulsus parvi, inaequales, celerrimique sunt, quia in hoc casu ulcus faucium tenacissimo, & li-

Angi-
na ma-
ligna.

vido

vido corio obductum nihil aliud est, nisi symptoma periculosissimi morbi a generali humorum corruptione pendentis. Hoc autem ipsa curatoria methodo aperte demonstratur; etenim sanguinis missiones, incisiva, diluentia, & antiphlogistica proprie dicta certissimam mortem

Ejus afferre consueverunt; at contra antisepticis, cura. calidis, aromaticis nempe, & adstringentibus praesidiis felicissimae curationes constituuntur.



Pulsus Pectoralis.

Inter partes, quae supra diaphragma collocantur, primum profecto locum merentur pulmones; si enim morbosa aliqua causa afficiuntur, statim difficilis, & saepe numero admodum laboriosa respiratio oritur. Hinc sanguis debito, constantique salubrioris, ac dephlogisticati aeris beneficio spoliatus phlogisticam naturam, & vitiosam primo tenacitatem facile assumit. Ob eandem rationem febres illae, quae essentialem pectoris morbum pro causa agnoscunt, continuae esse solent, & cum pulsum perenni duritie, & irritatione incedunt, quod quidem a congestionibus tenacissimae lymphae repetendum est. Pectorales pulsus omnes superiores sunt, & commode dividi possunt in externos, & internos, acutos, & chronicos. Sed ut a generali definitione ordiamur, *pulsus superior, durus, vehemens, in fine diastoles acutus,*

tus, & versus carpum instar arcus insurgens, morbos pectoris essentialiter designat. Si agitur de dolore externo thoracis, ut in vera pleuritide, & costarum simplici rheumatica aegritudine, arteria est magis externa, valde irritata, & insigniter dura. Verum in latere affecto ob vehementiam stimuli pulsus respondens arteriae magis coarctatur, quam in latere opposito; attamen in hac etiam observatione animadvertendum, quod in epidemica pleuritidis constitutione annis superioribus grassante fere semper dextera arteria vehementior, magisque evolutus, sinistra vero pulsus inferior erat. Causa hujus differentiae biliosis, corruptisque intestinalibus substantiis tribui debet. Et sane ubi morbi biliosi per inferiora judicantur, uti in hoc casu eveniebat, pulsus intestinalis characteres in sinistra arteria constanter apparent. Pulmones deinde praecipue affecti signa non in acutis tantum, verum etiam in chronicis morbis a pulsibus sequenti ratione dignoscuntur.

Media siquidem arteriae dexteræ pars in parvum, attamen duriusculum arcum elevatur; & elevatio haec pressione mediocri digito medio facta statim animadvertitur. Anterior deinde, scilicet quae versus carpum, & posterior arteriae pars, nempe quae versus cubitum extenditur, valde humilis, profunda, & quasi sepulta videtur. Quo validior est pulmonum inflammatio, & profundius hujus organi sedes causa phlogistica occupatur, eo obscuriores, magis-

gisque profundae sunt dexteri pulsus micationes, quemadmodum accidit in Peripneumoniacis. Igitur ubicumque in acutissimo quamvis pectoris morbo arteriae dexteræ vehemens, dura, ac vibrata elevatio observatur, periculosum non adeo erit morbi iudicium, quia naturae vires a calore pendentes validiores sunt, & simul causa morbosa potius exteriora, minorisque momenti loca occupat. Differentia haec quoad primariam sedem affectam naturam pleuritidis ab indole peripneumoniae diversam constituit. Igitur semper ac depressio, parvitas, atque profunditas in pulsu pectorali animadvertitur, de profundiori, periculosissimaque laesione substantiae pulmonalis dubitandum. Ideo in laterali pleuritide, quae in genuinam peripneumoniam mutatur, pulsus pectoralis, amissa vehementia, & imminuta ictuum duritie, & vibratione, per gradus minor evadit, atque absconditur cum maxima aegrotantium noxa. Rursum in laesionibus pulmonum inaequalitas in pulsationum rythmo, sive ordine naturali magnum instare periculum denotat. Etenim numquam inaequalitates evenire possunt, nisi obstacula, & difficultates insignes adsunt in circuitu sanguinis per vasa pulmonalia. Si inaequalitates periculosae sunt, intermittentia major profecto periculum portendit; quandoquidem intermissio haberi omnino debet pro confirmata, ac diuturna inaequalitate. Sinistra deinde arteria in morbis acutissimis, & lethali-
libus pulmonum evanescit in parte anteriori,

aliquantum elevatur in regione media, ac rursum magnopere deprimitur versus cubitum. Itaque Peripneumonici, & Phthysici in ultimo vitae stadio pulsum habent parvum, inaequalem, internum cum adnotatis conditionibus; & tunc aegrotantes ad interitum vergunt. Neque vos decipiat velim in peripneumonia elevatio illa arteriae, quae undosis fere, & molilibus pulsationibus constare videtur; hujusmodi enim pulsus proximam gangraenam declarat. Ita se res habet non solum in affectibus pulmonum, verum etiam in quacumque laesione organica, a qua gangraena oritur; idem saepe accidit in bubonocoele, anthrace maligno, & similibus. Pleuriticorum pulsus numquam parvi, internique evadunt, nisi prius causa vehementissima, quae externum dolorem gignit, internam quoque pulmonum inflammationem afferat. Attamen pulsus durus, vehemens, irritatus, & in parte anteriori carpi dexteri arcum elevatus non omnino a pulmonum congestione ortum ducit; quandoquidem a causa etiam externa oriri potest. Sed arcus pulsus dexteri cum febre conjunctus organicam actionem thoracis declarat. Acutissimi saepe numero, & fere intollerabiles thoracis dolores febre vacant, arteriaeque vehementes, sed externae potius, tardae, ac rarae deprehenduntur, neque ullam habent insignem inaequalitatem. Altero dein certissimo signo, nempe difficili, & difficili respiratione morbi pulmonum simplici, & externo rheumatico thoracis dolore

lore distinguuntur. Post vesicantium partibus dolentibus applicationem, incipiente praesertim secundo septenario in morbis pectoris, pulsus ampliores fiunt, peculiarem, quam possidebant duritiem, amittunt, atque post secundam, aut tertiam pulsationem ictum undosum, & molliusculum assumunt, certissima coctionis, & suppurationis signa praebent. Periculosissima quaedam accidentia, quae a cordis, aut magnarum arteriarum peculiari aliquo vitio pendunt, pulsus peculiaris characteres ostendunt.

Et quidem si cor quoad molem generalem, & quoad cavitatum ambitum praeternaturaliter augetur, pulsus pectoralis essentialiter mutatur. Dextera enim arteria parva, & irritata semper inaequalis reperitur; sinistra in parte anteriori cum magna vehementia vibrationes absolvit; inaequalitates, quae hoc tempore observantur, non sunt magni momenti, neque intermittendae frequenter occurrunt, quia morbus essentialis non substantiae pulmonali, sed cordi primo inhaeret, neque in thoracis cavitate adest ulla praeternaturalis lymphae collectio.

In aneurysmate multa quoad pulsum peculiari animadversione digna reperiuntur; nam non semper hic morbus cum constanti arteriae characterem conjungitur. Neque pulsus duritiem, magnitudinem, atque uniformem vehementiam habet, quemadmodum vulgares Medici existimant. Differt itaque aneurysmaticorum pulsus primo secundum sedem dilatatio-

nīs arteriosae ; secundo juxta tempus , a quo homo primum aegrotare coepit , ac tertio secundum vicinarum partium secundarias , sive per consensum evenientes aegritudines . Descriptio pulsus in aneurysmate arcus aortae , cujus exempla reliquis frequentiora sunt, ita profecto se habet . Incredibilis in regione cordis pulsatio animadvertitur cum dolore, qui usque ad scapulam ejusdem lateris extenditur ; tussicula adest vel sicca , vel cum expectoratione lymphatica sanguinolenta conjuncta . Decubitus in latus sanum difficillimus est ; aliquando magna pulsatio cum notabili tumore inter claviculam, & costas veras elevata observatur , & tunc arteriae dilatatio reperitur statim ac arteria a corde egreditur, magnumque ibi saccum efformat . Pulsus sinister superior est, admodum inaequalis, & durus, deficit, & absconditur in parte anteriori . Omnes pulsationes cum notabili tremore perficiuntur, atque micationes tremoribus chordae digitis pulsatae similes omnino videntur . Arteria brachii dexteri est plerumque dura, superior, vibrans, & quasi nodosa cum parvis inaequalitatibus . Verumtamen dum morbus augetur, atque non solum ob corporis summam debilitatem pedes oedemate tument, & brachium parti affectae respondens inflatur, sed ob sacci aneurysmatici immensam dilatationem cordis regulares, & uniformes pulsationes perturbantur . Imo ob retardatum sanguinis circuitum per vasa pulmonalia pulsus redduntur parvi, magnopere tamen frequentes, & inae-

Signa
aneu-
rysmatis in
arcu
aortae.

quales ; ut nulla fere industria pulsationes passim numerari possint. Arteria hoc in casu simillima est chordae , quae ob vehemerrimam pulsationem brevissimis , & diuturnis oscillationibus agitur . Vidimus ob saccum , quo complectebatur dextera clavicula , unde tumor integrum colli latus occupabat , pulsationes primo parvas , & frequentissimas , deinde admodum obscuras fieri . Hoc tempore aneurysmatici in imminente vitae periculo versantur . Rursum si saccus aneurysmaticus cum pulmonibus communicat, pulsus evadunt pulmonales , interni , ac inaequales , & tumoris ruptura accidit cum lethali copiosissimo sanguinis sputo . Atque ne ab arteriarum supra diaphragma dilatationibus discedamus, animadvertendum, quod in brachii aneurysmate varicoso , cujus peculiarem descriptionem in Nosologia Methodica evulgavimus , pulsus brachii affecti sit valde obscurus , inaequalis , neque admodum tremulus in carpo . Contra vero si loco communicationis vitiosae inter arteriam , & venam digiti admoventur , insignis tremor , sive potius sibilus sanguinis ab arteria in venam immediate transeuntis manifeste perferitur .


Dilatationes arteriarum , quae infra diaphragma excurrunt , summam gignunt in pulsibus differentiam , nam celeres sunt , & aliquando etiam frequentissimi , sed valde inaequales & parvi , neque insignem resistantiam digitis opponunt : saepissime vero constanti cum tremore agitantur . Omnes deinde in poplitea

arteria evenientes dilatationes etiam in principiis nequeunt pulsu aneurysmatico superius descripto distingui. Pulsus liquidem admodum sunt parvi, obscuri, tardi, & rari sine ulla duritie, aut inaequalitate. Pulsatio contra in parte affecta insignis peculiari duritie distinguitur, atque arteria in diastole summopere obtusa est. Si in aortae descendens trunco infra diaphragma existit aneurysma, pulsus semper inferiores, parvi absque ulla duritie observantur: imo progrediente morbo, arteriae in brachiis omnino fere evanescent. Palpitationes deinde enormes, quae in abdomine mulierum praesertim eveniunt, dilatationem aneurysmaticorum mentuntur. Sed tantummodo a vicinarum partium obstructione ortum ducunt, semperque pulsum reddunt inferiorem, parvum, rarium, & tardum. In hoc casu carotidum etiam pulsatio summopere augeatur. Cordis affectiones vel propriae sive idio-pathicae, vel per consensum evenientes sive sympathicae sunt. Cor rursus primario afficitur aneurysmate, palpitatione, & syncope. De pulsibus in prima aegritudine satis in superioribus disputavimus; sunt etenim magni, vehementes, vibrantes, & raro insigni inaequalitate distinguuntur. Tunc de integra, attamen proportionali omnium cavitatum, quibus cor componitur, dilatatione agitur. Pulsus in hoc casu raro obscurantur, & deprimuntur, quamvis saepe multa aqua in thoracis cavitate colligitur. Pulsus vero magni, & vehementes

cum assidua duritie cordis palpitationem a pulmonum congestionibus pendentem manifeste ostendunt. Cordis palpitatio diuturna, quae nihil aliud est, nisi perennis in rythmo articularum irregularitas, atque ab ipso ut plurimum pendet, pulsum gignit durissimum, valde vibratum, & acutum, imo quod caput rei est, pars anterior arteriae sinistrae, quae pulsum cordis declarat, praecipuas, & inordinatas, nempe irregulariter evenientes inaequalitates habet. Ictus minores, & profundi unica, aut duplici vehementiori elevata, & dura pulsatione excipiuntur. Post insignem, ac diu persistentem cordis palpitationem semper inveni pulsum sinistrum magnopere inaequalem, & fere intermittentem; oppositus vero magnus, diuturnusque est. Attamen semper ac, uti supra innuimus, frequentes observantur inaequalitates, hae dependent potius ab affectione partium cordi proximarum, quam ab ipsius cordis essentiali aegritudine.

In syncope, a quacumque causa oriatur, semper pulsus aut omnino evanescunt, aut valde profundi, & capillares redduntur, naturalis quoque frequentia magnopere imminuitur. Hinc post syncopem pulsum primo languentem, parvum, tardum, ac rarum aegrotantes habent, statim deinde acceleratur, uti accidit in sanis etiam hominibus post somnum naturalem. Verum palpitationes cordis sympathicae quotidie a vermibus intestinorum, obstructionibus imi ventris, uterique statu convulsivo ortum ducunt.


cunt. Primo itaque in secundariis cordis morbis pulsus sunt inferiores, si causa in cavitate abdominis collocatur. Inaequalitates itaque, & intermittentes cum arteria parva, & languida copulantur; neque ulla peculiaris durities animadvertitur. Si cordis palpitaciones vehementiores, & per intervalla evenientes pulsum efficiunt inferiorem, attamen inaequalem, & praesertim intermittentem, tunc procul dubio intestina vermibus replentur. Ut plurimum cordis palpitaciones modo descriptae cum doloribus intestinalibus conjunctae, si intermittentes quoque gignunt, certissime de taenia agitur; quemadmodum numerosissimae observationes declarant. Pulsus itaque in hoc casu sunt inferiores; in omnibus tamen ictibus distincta accidit irregularitas, atque post secundam, aut tertiam inaequalem micationem valde manifesta, & admodum protracta intermittens observatur. Haec tamen conditio, nempe intermittens potius in dextera, quam in sinistra arteria occurrit. Non modo nostris, verum etiam aliorum observationibus haec differentia pulsuum in palpitatione cordis sympathica penitus confirmatur.



C A P U T III.

De Pulsibus Organorum, quae infra Diaphragma continentur.

OMnes, qui infra diaphragma existunt morbi, & modo viscerum actiones, modo humorum oeconomiam perturbant, peculiari ratione pulsum aut regularitatem, aut reliquas conditiones pervertunt. Ut ordine peculiari nostra progrediatur oratio, primum de pulsu ventriculi, de reliquis deinceps pertractabimus.



Pulsus Stomachalis.

Et si nullam mutationis rationem, sive explicationem pulsus sthomacalis adhuc reddere possimus, tamen certissimis observationibus evincitur pulsum in carpo arteriae dexteræ essentialiter mutari, dum aut in ventriculo, aut versus pylorum causa morbofa sedem habet. Parvus etenim & inferior est pulsus dexter, uti in omnibus abdominis laesionibus; in parte media parvam irritationem, & elevationem habet; absconditur vero, ac profundus est circa articulationem carpi, & versus cubitum.

Num.

Numquam duram illam, & vehementem, sive in arcum elevatam eminentiam habet, neque vibratus est, ut in morbis pulmonum. Quo major modo descripta elevatio est, ventriculus copiosiori turgēt viscida lymphā, quae frequenter nauseam, oris amarorem, album linguae tartarum, saepissimeque vomitum spontaneum gignit. Haec pulsus ventriculi conditio confirmatur in administratione medicamentorum emeticorum; etenim statim ac nausea excitatur, arteria dextera in parte mediā attollitur, neque suam amittit praeternaturalem elevationem, nisi post integram ventriculi evacuationem. In cardialgia, vehementissimo scilicet ventriculi dolore, primum pulsus inferiores valde parvi, & insigni spasmō coarctati repertiuntur. Sed dum vomitus spontaneus accidit, arcus modo descriptus in arteria dextera nascitur: pulsus vero in hac aegritudine frequentissimus, atque celerrimus est. Non raro ob tumorem ventriculi, & magis ob duritiem, aut callositatem in pyloro efformatam pertinacissimus omnium, quae ingeruntur, substantiarum vomitus oritur cum pulsu stomachi conjunctus; tunc de peculiari hujus organi laesione minime dubitamus. Solet etiam per consensum ventriculi affectio excitari; nam ab hepatis, splenis, aut omenti obstructione, & mole valde adaucta stomachus comprimitur, & nausea cum vomitu spontaneo accidit. In morbo nigro Hippocratis, dum uberrimo vomitu sanguineo aegri corripuntur, statim pulsus

ventriculi apparet, & inaequalibus five potius dichrotis ictibus componitur. Tunc etiam atrii sanguinis dejectiones per inferiora eveniunt, & plerumque aegri hac ratione a gravissimo morbo sublevantur. Fortasse constans illa, & perennis elevatio arteriae dexteræ, quæ in mulieribus uterum gravidum esse procul dubio significat, a præternaturali ventriculi statu, & assidua vomendi necessitate ortum ducit. Venena propinata, præsertim vegetabilia, corrosiva, & stupefacientia, uti cicuta aquatica, & veratrum, atque cathartica vehementiora primum arteriam dexteram pervertunt, nempe pulsum ventriculi maxime irritatum, parvum, & inaequalem efficiunt, ac postea cum adnotata superius elevatione vomitum gignunt. Idem accidit fungis suspectis, atque veneno sublimati corrosivi; gravissimi enim sequuntur ventriculi affectus, qui a parvitate, & irritatione pulsus dexteri dignoscuntur. Tumores, qui circa pylorum efformantur, atque perennem vomitum excitant, sæpenumero ab inconsiderata sublimati corrosivi administratione oriuntur. Pulsus dexter in hoc casu parvus est, irritatus, & eminens in parte media; imo pulsationes vehementiores frequenter insurgunt, atque suppurationis indicium præbent, uti super innuimus. In magnis quoque hepatis obstructionibus pulsus ventriculi est semper tardus, parvus, ac rarus, quia hepar vicinum ventriculum comprimit, & ideo perennem nauseam, ac vomitum gignit.

Pulsus Intestinalis.

Ventriculo adnectitur longissimus, ac diversimode complicatus tubus intestinalis, quo alimenta continentur, ulterioribusque mutationibus obnoxia evadunt, ac deinde partim sanguini communicantur pro nutritione, partim excrementorum forma per secessum evacuantur. Intestina incredibili irritabilitate, ac sensibilitate praedita facile vel ipsis diversarum substantiarum tenuissimis vaporibus, vel crassioribus vitiosis moleculis afficiuntur. Morbum vero intestinis haerere certe adfirmabimus, cum arteria sinistra versus cubitum adeo deprimitur, atque obscuratur, ut fere observari nequeat. Aliquando in medio elevatur, aliquando etiam irregulariter deprimitur, & profunda est. Elevatur, dum in acutis morbis vitiosissima sive corrupta bile intestina turgent, atque haec mutatio deprehenditur ante coctionem. Deprimitur vero in diuturna alvi stypticitate, & praesertim obscuratur versus cubitum. In habituali diarrhoea, aut in dysenteria diuturna arteria sinistra semper peculiarem irritationem, & parvam elevationem in parte media ostendit, saepissimeque cum pulsu intermittenti conjungitur. Parvitas itaque, atque depressio arteriae sinistrae versus cubitum certissimorum morborum intestinalium characterem constituit. Quod si a causa vehementissima intestinorum

oeconomia essentialiter perturbatur, uti accidit in bubonoecele, primis diebus pulsus modo descriptus observatur. Verum si pars affecta ad necrosim vergit, tunc per 24. horas pulsus elevantur, magni, & aperti redduntur, attamen sine ulla aegrorum utilitate; nam post pulsus non omnino magnum, sed potius vacuum, minimeque resistantem, semper gangraena sequitur. Si morbus aliam occupat sedem, & natura causam morbificam per intestina evacuare molitur, tunc pulsus sinister reliquis amissis conditionibus inferior redditur, & depressionem versus cubitum acquirit. Hoc observatur saepenumero in erysipelate, dum externa inflammatio per urinae vias perfecte judicatur; arteria sinistra in hoc casu valde deprimitur in parte media, & tunc urinae ut plurimum sanguinolentae copiosius emittuntur. Pulsus intestinalis cum intermittentiis copulatus diarrhoeam criticam indicare solet juxta Solani doctrinam, neque intermittenciae in hac aegritudine ullam aequalitatem, aut regularitatem servant. Verum pulsus intestinalis, atque intermittens non est semper diarrhoeae criticae indicium; quandoquidem in pertinaci, diuturnoque alvi fluxu saepissime intermittencia observatur, & arteria sinistra ob magnam debilitatem fere capillarisprehenditur. Igitur non indiscriminatim pro salutari critico fluxu haberi debet diarrhoea cum intermittentiis conjuncta, imo potius referenda est ad languidum corporis statum, quo fit ut arteriae

aliquando naturales pulsationes absolvere nequeant. Quemadmodum de alvi fluxu tam acuto, quam chronico sermo incidit, pauca ad pulsus dysentericorum pertinentia adnotabimus. Dysenteria itaque affecti homines proprio distinguuntur pulsu, cujus conditio summam cum pulsu fluxus haemorrhoidalis analogiam habet. Hujus igitur descriptio pulsus dysentericorum proprietates indicabit.

Pulsus Haemorrhoidalis.

Fluentibus haemorrhoidibus sinistra arteria versus partem mediam magna, elevata, vibrans, & dura est, atque medio observatoris digito satis externa occurrit, manifestas habet inaequalitates, & in carpo nempe in parte anteriori obscurissima, & magnopere profunda evadit. Oppositi deinde brachii arteria est plerumque parva, & insigniter irritata. Quae a nobis traduntur pulsus haemorrhoidalis proprietates, fere semper observantur, interdum dum fluxus imminet, interdum in ipso evacuationis vigore, & saepe supersunt, & vigent per satis longum temporis spatium post fluxus haemorrhoidalis cessationem. Parvi sane momenti est differentia, quae inter modo descriptum, & dysenteriae pulsum intercedit. In principio enim tenesmi, & doloris atrocitate, atque dum causa morbi intestinis inhaeret, ar-

te-

teria sinistra incredibilem ostendit irritationem, atque ictus, qui medio observatoris digito percipiuntur in carpo sinistro, durissimi, & vibrantes sunt sine notabili elevatione. Neque in ulteriori aegritudinis progressu magnam expansionem in designato loco arteria acquirit, quia morbus numquam a sanguinis praeternaturali repletionem, sed ab acri, & corrosivo humorum statu oritur, atque ideo validam arteriae dilationem gignere nequit. Rursum qui diuturna praesertim dysenteria infestantur, & totius corporis debilitate, semper pulsus habent languidos, & parvos. Adnotata elevatio partis mediae arteriae sinistrae, quae tamen nullam habet peculiarem duritiem, observatur quoque in fistulis intestini recti, in gonorrhoea postica, & in omnibus organorum genitalium morbis: post chirurgicam operationem in fistula ani consolidato intestini loco affecto pulsus elevatio prorsus evanescit. In bubone venereo dexteri, aut sinistri inguinis semper adest descripta elevatio sinistri pulsus, quemadmodum innumeris observationibus manifeste evincitur. Causa horum pulsuum fortasse pendet a vitioso hepatis, & lienis statu in fluxu haemorrhoidali, & dysenteria; nam essentialis horum organorum affectus ejusdem fere naturae pulsibus distinguitur, uti mox enarrabitur.


Pulsus Hepaticus .

Juxta comunem Medicorum sententiam in hepatis morbis, nempe in obstructione, tumore scirrroso, inflammatione, & similibus mutationibus semper arteria dextera explorari debet, quae non solum parva, irritata, & inaequalis animadvertitur, verum etiam aliquando prorsus evanescit. Sed mutatio haec pulsus dexteri potius symptomatice appellari meretur, nam ventriculi, non hepatis aegritudinem significat; atque accidit ob adauctam hepatis ipsius molem, unde ventriculus praeternaturaliter comprimitur: & sane in hepaticis non solum linguam denso tartaro obductam, verum etiam nauseam, vomitumque spontaneum observare solemus. Pulsus contra hepaticus essentialis non in dextera, sed semper in sinistra arteria investigari debet; siquidem in omnibus hepatis morbis pars anterior arteriae sinistrae aut omnino evanescit, aut nonnullas pulsationes profundissimas, & admodum inaequales absolvit. Quod si de acuto hepatis affectu agitur, haec pulsus conditio cum vehementi motu febrili conjungitur; semper vero arteriae inferioresprehenduntur, praesertim in diuturnis hepatis morbis. Non raro etiam pars media arteriae sinistrae elevatur, & pulsationes gignit vehementiores, quia dum hepar aegrotat, ut plurimum venae haemorrhoidales aut simpliciter turgent, aut co-

F

pio.

piofum sanguinem emittunt. In suppuratione hepatis pullus modo descriptus majores habet inaequalitates, attamen arteria semper mollior est post perfectam suppurationem. Denique in obstructionibus, aut in durissimo hepatis scirrhus arteriae sunt tenues, tardae, & admodum rarae, quemadmodum observatur in diuturnis intermittentibus, quae ab aëre palustri, aut ab aquis argillosis ortum ducunt: tunc etiam pertinacissimae in substantia hepatis obstructiones efformantur.



Pulsus Splenicus ?

In descriptione pulsus haemorrhoidalis praecipua, quae ad splenicum quoque pertinebant, tradidimus. Itaque in splenis tumore insigni, si pars inflata versus diaphragma elevatur, tunc pars media sinistrae arteriae admodum turget, & non mediocrem vehementiam nanciscitur; quamvis raro ulla in fine diastoles sensibilis vibratio animadvertatur. Arteria sinistra splenicorum versus cubitum saepenumero valde depressa, & obscura est, quia hujus organi laesiones incredibilem alvi stipticitatem gignunt. In pulsu splenico aliquando inaequalitates adfunt, sed praecipue arteria dichrota, sive bis feriens apparet, dum haemorrhagia ex sinistra nare accidit propter obstructiones diuturnas. Demum in splenis obstructionibus illis, in quibus

us tumor non versus superiora extenditur,
 sed ad inferiora vergit, pulsus sunt inferio-
 res, depressi, & omnino intestinales. Hac
 observatione evincitur, quod elevatio, &
 vehementia arteriae sinistrae in splenicis sit
 totius accidentalis pulsus superioris, & praeci-
 pue pectoralis apparentia. Saepenumero ob diu-
 urnum splenis tumorem, ventriculus magna
 compressione afficitur, & non solum huic aegri-
 tudini cardialgia, verum etiam vomitus san-
 guineus supervenire solet. In hoc casu arteria
 dextera admodum parva, & irritata, nempe
 stomachalis evadit; sinistra vero valde inaequa-
 lis, & undosa redditur. Vomitus sanguineus
 non raro in atrae bilis vomitum mutatur, &
 hoc tempore arteriae deprimuntur insigniter,
 atque totius corporis calor dissipatur.

Pulsus Vesicalis, & Renalis.

Certam pulsus vesicalis, atque renalis definitionem tradere difficillimum est; hinc quae observationes mihi suppeditarunt, quamvis imperfecta, exponam. Si igitur vesica laborat, & homo stranguria afficitur, statim sinistra arteria deprimitur, profunda, obscura, atque se-
pulta est in parte media, illa scilicet, quae medio observatoris digito respondet. Opposita vero inferior quoque est, verum valde vibrans instar chordae, & summopere inaequalis redditur. Criticae urinae evacuationes semper depressionem in parte media sinistrae arteriae nobis ostendunt. Vidimus arteriam sinistram profundissimam, & valde inaequalem ob integram urinae suppressionem a spasmo ortam: lotio tamen evacuato ope emulsionis opiatae, arteria elevabatur cum naturali dilatatione. In abscessu renum arteria parti affectae respondens semper depressa, & fugitiva est in parte media; antea vero parvas, attamen undosas pullationes absolvit, quod quidem suppurationem renalem manifeste declarat. Depressio pulsus sinistri in parte media omnes essentielles vesicae urinae aegritudines indicare videtur, quemadmodum numerosis observationibus nostris evincitur.

Verum si venarum haemorrhoidalium ramificationes, quae circa collum vesicae reperiuntur,

riuntur, vel praeternaturaliter turgent, vel aperta mictum cruentum gignunt, pulsus sinister, quamvis vesicalis, attollitur tamen, & frequenter admodum vehementes pulsationes absolvit. Idem accidit si urina difficulter evacuetur ob tumorem vasorum haemorrhoidalium externorum, uti observatur in gravidis mulieribus, ultimo praesertim gestationis mense. In memoratis etenim casibus arteria sinistra cum peculiari vehementia essentialem pulsus haemorrhoidum characterem constituit. Saepenumero in morbis hepatis excitatur renis dexteri aegritudo; oritur enim nephriticus dolor cum urinae suppressione; tunc pulsus dexter parvus, & valde depressus est; sinister vero magnopere deprimitur versus carpum, atque omnino hepaticus evadit. Hujusmodi complicationes pulsus compositos efformant, & indicationibus curatorii recte instituendis primario inserviunt.

Pulsus Uterinus .

Inter pulsus organicos magni momenti praecipua adnotatione digni sunt pulsus uterini , quibus modo naturalis , modo morbosus hujus visceris status designatur . Et primo quidem inter inferiores collocandi sunt pulsus uterini , atque in parte media arteriae dexteræ sunt investigandi . Menstrui itaque sanguinis fluxus etsi in sanis mulieribus eveniat , attamen si deficit , aut læsionem aliquam essentialem , aut graviditatem significat . Tamen in sanissimis etiam corporibus actionem peculiarem gignit , quæ non sine aliqua & sæpe insigni aliarum functionum perturbatione absolvitur . Hinc imminente , progrediente , ac desinente menstruatione arteria dextera versus mediam partem inaequaliter elevatur , & quasi undosa apparet , quia pulsationibus modo parvis , & inaequalibus , modo undosis , & insurgentibus distinguitur . Constanter vero pulsus uterinus inferior est , atque in sinistro carpo absolute intestinalis , parvus , & tardus deprehenditur . Ubi menstruatio instat , per plures horas dextera arteria admodum coarctatur , & sæpe evanescit ; postea cum elevatione irritata videtur , quia natura sanguinis evacuationem molitur . In progressu arteria patentior , atque undosa redditur ; imo dum sanguis abundanter evacuat , pulsationes magis undosæ , magisque ex-

ternae redduntur : Hoc itaque tempore ab omni medicamento abstinendum ; numquam enim in suis operationibus perturbari debet . Praesertim vero diligenter observari debet pulsus menstruationis , si mulieres acuta febre laborant ; etenim utero tamquam emunctorio natura utitur ad vitiosas substantias eliminandas e mulierum corpore . In graviditate pulsus menstruationis manifeste insurgit , nullo tamen superveniente fluxu uterino ; interim mulier nauseosa , vomituque post cibam assumptum constanter perturbatur . In primo gestationis mense arteria dextera obscurissima , valde profunda , & fugitiva est , quia si mediocriter comprimitur , statim evanescit . Hoc autem certissimam uteri gravidi indicium suppeditat . In secundo mense pars media arteriae dexterae , uti in menstruatione , elevatur , verum parvum arcum ostendit , & pulsationes undosas absolvit . Rursum ante partum pulsus dexteri elevatio , ac vehementia cum magnis inaequalitatibus , & saepe cum incredibili frequentia observatur . Quo frequentiores sunt pulsus , eo magis partus appropinquat , quod quidem vulgarissimis observationibus abunde confirmatur . Statim vero post partum naturalem , mulieribus bene valentibus , pulsus tarditatem , & raritatem acquirunt ; supersunt tamen parvae illae inaequalitates , quae lochialem evacuationem comitantur . In fluxu albo diurno pulsus menstruationis semper observatur ; differt tamen pulsationibus mollioribus , quia lympham

tantum mucosa, non vero sanguis emittitur. Pulsus uterini accurata diligentia ad diagnosim morborum in puerperis evenientium magnopere conducit. Nam si pulsus uterinus deficit dum puerpera acutissima febre afficitur cum abdominis meteorismo, & hypogastrii dolore, non de uteri, sed contra de intestinorum morbo essentiali dubitandum. Hoc etenim in casu lochiales evacuationes non interrumpuntur, & interim lethargici, & convulsivi affectus excitantur. Causa gravissima hujus morbi non solum ab intestinali saburra, verum etiam a lactis diffusionem per totum corpus ortum ducit.

C A P U T IV.

De Pulsibus Compositis.

SI generales tantum pulsuum differentiae; aut si organicae tantummodo mutationes in morbis adessent, sphymica doctrina facillima prorsus evaderet. Sed non in acutis modo, verum etiam in chronicis tanta saepenumero in arteriarum pulsatione varietas animadvertitur, ut contra pulsus species difficulter possit determinari. Hujusmodi aberratio a generalibus speciebus, & characteribus superius expositis pendet a numero, & varietate incredibili symptomatum, & aegritudinum, quibus graviores corporis affectus stipantur. Modo enim irregulariter, modo aequabiliter arteriae micant; modo durae, & vehementes, modo depressae, & molles apparent. Ab hac irregularitate adeo pulsuum characteres pervertuntur, ut genuinae aegritudines dignosci nequeant. Nascuntur inde pulsuum compositorum varietates, quae frequentissimae sunt in morbis humorum, atque in generalibus nervorum affectionibus. Rursum anomaliae, & aberrationes pulsuum, quae etiam in organicis morbis observantur, criticarum perturbationum, & evacuationum certissima indicia sunt. Hinc si ex-

gr. in angina inflammatoriâ, quae pulsum gutturalem, nempe superiorem essentialiter inaequalem, sed irritatum, & coarctatum efficit, arteria elevatur, ac nonnullas vehementiores pulsationes ostendit, procul dubio tonsillarum suppuratio absoluta est. Si rursus in eodem morbo pulsus omnino externus, undosus, ac proinde mollis versus terminum primi septenarii animadvertitur, tunc criticus sudor cum perfecta morbi judicatione expectandus. Organico itaque anginae pulsui superadditur pulsus universalis evacuationis criticae, nempe pulsus sudoris. Tunc nulla adhibenda sunt praesidia, ne scilicet salutare naturae operationes interrumpantur. In morbis phlogisticis, si obscurae primis diebus, sepultae, & internae arteriae medicamentis excitantibus, & resolventibus opportune administratis eleventur, simulque frequentiam, & undosas inaequalitates assumunt, bonum; hoc enim novam fugientis principii vitalis evolutionem significat, atque vitalitatis renovatione beneficis sudor obtinetur. Ita post largiores vini doses in memoratis morbis constanter evenire observatur. Frequentes etiam sunt acutae illae aegritudines, quae communi curriculo praetergresso ad quartam usque, vel quintam septimanam, gravioribus accidentibus non interruptis, progrediuntur. Pulsus febriles semper summam duritiem, & obstinatas inaequalitates admodum habent. Aliquando manifeste exacerbatur febris, atque in singulorum septenariorum initio majoris momenti

sym.

symptomata excitantur: Calor enim molestissimus adest, evacuationes alvinae constant bile intense flava, & essentialiter phlogistica, corpus praeternaturali macie conficitur, & cutis ultra modum exiccata aeneum fere colorem assumit. Pulsus in hoc casu duri, & vehementes substinentur a calore interno, cujus magna copia a phlogisto exturbata solidas partes differit, in apertum egreditur, atque dum sensibilis caloris locum occupat, pulsum irritationem, duritiem, & irregularitatem gignit. Phlogisti deinde superabundantia bilis naturalem inflammabilitatem magnopere adauget.

His positis, antiphlogistica aquosa cum cordialibus, parcius tamen combinata curationem absolvunt. Singulorum vero septenariorum initio, uti dictum est, morbus universalis exacerbatur, quia natura quas per plures dies concoquere tentavit vitiosas substantias, majori excitato tumultu hoc tempore evacuare nititur. Ideo aut pustulae ad exteriora determinantur, aut aphthae molestissimae in palato, & exophago efformantur, aut tussis ob congestionem pulmonalem nascitur, aut denique alvus biliosa abundanter demittit. In omnibus hisce imperfectis crisis pulsus novam qualitatem, novosque characteres ostendunt. Et sane si decurrente morbo pustulae apparent, arteriae vehementiores, & inaequales, nempe externae fiunt, uti accidit in omnibus eruptivis affectibus. Post absolutam eruptionem valde deprimuntur, quia a morbi malignitate, atque a vitalis prin-


capituli imbecillitate gubernantur. In altero septenario molesta, quae excitatur tussis, a pulsu pectorali designatur, atque inaequalitates arteriarum a faucium inflammatione, & ulcere pendent. Denique si alvus biliosas evacuationes praebet in ipso morbi decursu, deprimitur sinistra arteria, & aliquando intermittentias habet. Rursum in longis hisce febribus a bilis degeneratione pendentibus, si caput soporoso affectu opprimitur, fere semper convulsiones nascuntur, quae pulsus reddunt inaequales, & praesertim tremulos. Tremor vero arteriarum minime confundi debet cum tremore carni, qui oritur ob corporis imbecillitatem, & irritabilitatis perturbationem. In acutis itaque nova supervenientia symptomata, aut criticae mutationes statis temporibus excitatae, peculiare in pulsationibus arteriarum varietates gi- gnunt, unde compositi pulsus nascuntur.

Qui revera biliosi dici merentur morbi, quia longissimi sunt, & non raro ultra quartum, & etiam quintum septenarium progrediuntur, atque bilis admodum croceae evacuatione, constanti calore urentissimo, lingua rubra, & sicca, delirio, & soporoso aliquo affectu distinguuntur, pulsum sibi proprium habent. Arteriae enim fere semper superiores, ac capitales sunt, & quamvis aeger virium imbecillitate afficiatur, durae, & vehementes apparent una cum magna frequentia, summaque celeritate. In primo septenario arteria dextera stomachalis deprehenditur, quia natura

vomitum excitare molitur. Post evacuationem ventriculi aut naturalem, aut artificialem arteria dextera elevatur, & pulsus capitalis characterem assumit. Dum novus instat paroxysmus febrilis, mediocriter deprimitur, atque irritatur pulsus, simulque caput gravatur. Deinde vehementissimus, & universalis calor evolvitur. In hoc casu permanens pulsus magnitudo capitis aegritudinem significat, semperque iudicium Medicis suspectum reddit. Calor eandem intensitatem servat, & vehementiae pulsum suam quoque symbolam addit. Febriles acutissimi infantum affectus pulsum habent frequentissimum, & inaequalem ob rationes alibi adnotatas. Verum ubi convulsionibus aut imminet, aut jam apparuerunt, non solum febrili rigiditas pulsum, sed manifestus etiam arteriae tremor, sive stridor in diastole accedit. Numquam haec pulsum mutatio a convulsionibus sejungitur, & indicationem curatorium antispasmodicis, & diluentibus superstruendam esse ostendit. Tremor etiam arteriarum observatur in variolis malignis, praesertim ubi post absolutam pustularum suppurationem, & exiccationem febris diuturnitas de graviore, periculosoque morbi exitu nos admonet.

Diuturnae, ac lentae febres, quae a vitio humorum tantummodo oriuntur, atque ab organica aliqua laesione pulsus sejunguntur, statim ac irregularitates ostendunt, ictusque arteriarum vel simpliciter inaequales, vel manifeste undosi redduntur, de abscessu externo, aut de

sudore critico dubitandum. Hac profecto ratione diuturnarum febrium judicatio accidit, si medicamenta stibiata opportune administrantur. Reliquae compositorum pulsuum differentiae, quae cum pulsibus organicis copulantur, ex dictis erui possunt; in hoc enim capite de humorum vitiis, a quibus pulsus peculiariter mutantur, breviter loquuti sumus. De sphygmicis observationibus a nobis per plures annos diligenter institutis in praesentia satis; uberior enim ejusdem doctrinae explicatio opportuniori tempore lucem videbit. At ne operam inutiliter impendere videamur, ad perfecte explendum hunc scholasticum curriculum quasdam alias doctrinas oculis vestris subijcere perquam necessarium esse duco, quae a diversis apparentiis in morbis acutis, & chronicis tum linguae, tum excrementorum ventralium, urinarum, atque partium corporis externarum desumuntur, quibus facillime diagnosi, & prognosis institui potest.



C A P U T V.

De Signis , quae a Lingua petuntur.

Numerosa profecto signa pro diversorum morborum intelligentia a lingua petuntur. Partis hujusce superficies saepe constantem in praecipuis morbis characterem servat. Ab humorum tantummodo vitio vel uniformiter albo tartaro tenuissimis , & vix conspicuis granulis composito obtegitur , uti in omnibus lymphaticis , & phlogisticis affectibus , atque in febribus ab aëre palustri ortis observatur ; vel admodum rubra est , & aliquando crustam sanguine concreto efformatam gerit lingua , uti in progressu phlogisticorum morborum accidit. In memoratis febribus lingua non solum rubra , & nigro sanguine obducta apparet post primum septenarium , sed ejus substantia summo opere exiccatur , & absolute magis inflata , crassiorque evadit. Variolae , morbilli , scarlatina , erysipelas , omnesque morbi cutanei linguam crasso tartaro a basi usque ad duas partes suae longitudinis obductam habent ; apex contra ruberrimus apparet , atque puncta rubra , distincta tartaro semper interspersa sunt. In memoratis casibus linguae mutatio modo descripta morbi evolutionem longe praenuntiat.

Adeo

Adeo hoc verum est, ut in artificialibus variolis sexto, aut septimo ab insitione die lingua jam mutata deprehendatur. Thoracis, & pulmonum non acuti modo, sed etiam chronici affectus magni sane momenti signa ex lingua nobis praebent. Etenim ubi pectus afficitur, lingua ut plurimum cingulo rubro per marginem a basi ad apicem excurrente circumdatur; superficies vero tegitur tartaro albo crassissimis, rotundis, & distinctis moleculis composito. Contra in morbis viscerum naturalium, & praesertim hepatis lingua, excepto apice rubro, tota velamento albo inducitur. Tartarum vero linguae constanter crassum acinis elevatis factum praecipuum est signum laesionis pectoris; nam tenue apparet, dum causa morbi abdomen occupat; ita praesagium facile erit institui. In progressu vero nonnullarum aegritudinum lingua primis diebus undique alba extimae pelliculae membranulas per intervalla dimittit, unde maculas partim albas, partim rubras habere videtur. Linguae demum ariditas major, aut minor a generali pendet humorum, & solidorum partium constitutione.



C A P U T VI.

*De Signis , quae ab urina , & excrementis
eruantur .*

ENarrandae nunc sunt urinarum in acutis ; ac chronicis morbis , atque excrementorum intestinalium apparentiae ; hisce enim inspectis , saepissime Medicus de morbi natura , statu , mutationibus , ac duratione certum iudicium pronuntiare poterit .

Alimenta , quae sanorum corporum sustentationi quotidie inserviunt , juxta varium ventriculi , & intestinorum statum diversimode mutantur . Primum masticatione , deinde mixtione fluidi salivalis , oris calore , & expirati aeris peculiari proprietate alimenta omnia , & praesertim sicca , sive solida non mediocrem alterationem nanciscuntur . Rursum in ventriculo ulterior , & absoluta ciborum decompositio oritur ; a calore etenim , atque a copiosissimo succo gastrico principia , quae cohaerentiam in omnibus substantiis efficiunt , omnino separantur . Sequitur inde dissolutio absque ullo tamen genuinae putrescentiae , & vere corruptionis signo . Absoluto ventriculi munere , & ciborum decompositione magna ex parte peracta , chyli , & excrementorum particulae ad

G

in.

intestina feruntur. Et quidem molecularae chyli, quae pinguibus, & mucilaginosis praesertim elementis constant, tenuissimis lacteorum vasorum osculis suscipiuntur, & praecipuum nutritionis fundamentum constituunt. Post primam chyli absorptionem magna remanet in intestinis excrementorum saburra, quae quia per longum tempus saepe in calido humidoque loco stabulat, & copiosum emittit inflammabilem vaporem, putridam naturam acquirit, bilisque etiam mixtione ad alcalescentiam perducitur. Substantiae intestinales excrementitiae ut plurimum dato tempore evacuantur, nullamque noxam afferunt. In multis tamen morbis causam essentialem suppeditant, & diversorum humorum originem constituunt. Rursum evacuationes alvinae criticam naturam assumunt, atque morbum modo in melius, modo in deterius mutant.

Inter varias evacuationes, quarum salutari opera morbi vehementiores perfecte judicantur, primum merentur locum illae, quae per alvum, & per urinae vias absolvuntur. Sudores enim critici rarius perfectam judicationem, saepius morbi generalis tantummodo remissionem gignunt. Generali itaque naturae instituto primum vigentibus acutis morbis emunctoria fere omnia silent, vel tenuissimas excernunt, minimeque criticas substantias. Hoc tamen pro bono, salutarique signo habendum; nam in febrium initio si alvus cum profluvio soluta est, morbus malignus statim extremos experitur labores,

sum-

summam corporis debilitatem procurat, crudi-
 que humores simul cum bonis nulla praevia
 coctione cum maximo aegrotantium periculo
 excernuntur. Ideo dysenteria, aut diarrhoea
 in acutorum principio corruptelam humorum
 pro causa agnoscit. Interdum vero oritur a cau-
 sa inflammatoria, qua intestina praeternaturali-
 ter irritantur. Hic autem est praecipuus casus
 inflammatorii pectoris affectibus, in quibus
 pessima est diarrhoea primis diebus apparens
 juxta Hippocratis observationem: ait enim in
 aphorismo IV. *A pleuritide, aut peripneumo-*
nia alvi fluxus superveniens, malum. Verum
 si morbus pectoris a bilis redundantia, & vi-
 tiosa primarum viarum saburra gignitur, diar-
 rhoea in primo septenario eveniens morbum
 solvit. Hoc autem cum aliqua certe admira-
 tione, atque frequenter in praxi observavimus.
 Evacuationes, quae critico praesertim tempore,
 praegressis omnibus coctionis, & separationis
 signis accidunt, morbi judicationem absolvunt.
 Quapropter magnopere interest intelligere le-
 ges, quibus natura utitur dum salutarem diar-
 rhoeam, aut urinae profluvium excitat, sedulo-
 que dignoscendae sunt horum excretorum qua-
 litates in statu sano, atque morbo. In sano
 itaque, & bene constituto corpore post ciborum
 digestionem alvus excrementis expurgatur so-
 lidijsculis, figuratis, fusco, sive ferrugineo bi-
 lis colore confectis, & gravi alcalino volatili
 odore praeditis. Si evacuatio componitur sub-
 stantijs inaequalis consistentiae, & diversi co-
 lo-

loris, tunc depravatam esse ciborum digestionem deprehendimus. Descripta modo evacuationum notitia coctionem perfectam indicat quia quae excernuntur faeces, ortum ducunt a separatione inter particulas nutritioni dicatas & substantias crassiores, terreas, magisque inertes, quae copia, & qualitate sua, si retinentur, maximum oeconomiae animali damnum afferunt. Oportet tamen pro coctione, ut alimenta ingesta nullam qualitatem praeternaturalem possideant vel nimis acidam, vel summo pere alcalinam, ne scilicet summa acrimonia intestinalia irritentur. Acerrima alimenta, & quae acidum praesertim copiosum pro basi habent, aliquo temporis spatio elapso alvi stypticitatem, coloris defoedationem, summamque nutritionis imminutionem gignunt. Quia acidi vehementioris actione lacteorum absorbentium canales primo non solum valde coarctantur, sed etiam magna ex parte oblitterantur; secundo loco bilis qualitates juxta hepatis temperiem, & sanguinis constitutionem mutantur. Calor immodicus in plethorico corporis habitu bilem copiosorem generat, unde non solum ob hanc causam biliosi morbi in plethoricis, & rursus inflammatorii in biliosis observantur; sed etiam qui copiosam generant bilem, febribus putridis, colicis doloribus, atque evacuationibus haemorrhoidalibus frequentius subjiuntur. Ut vero evacuationes alvinae, quae magnopere a bilis naturalis stimulo adjuvantur, secundum leges animalis oeconomiae eveniant, requiritur certum,

tum , ac determinatum tempus , & robur in fibra musculari , quae si peculiari irritabilitate caret , evacuationes valde irregulares reddit . Quaecumque etenim aegritudines irritabilitatem pervertunt , evacuationum quoque intestinalium perturbant . Sed oportet ut a generalibus ad peculiariora deveniamus .

In omnibus morbis , & praesertim acutis ubi naturae vires constanter operantur , causae morbosae ab humoribus separantur , sedes organicas , quas antea occupabant , omnino relinquunt , & tunc cruditati proprie dictae coctio , sive concoctio succedit . Antequam vero de bene coctis faecibus , & de excrementorum optimam crism indicantium qualitatibus differamus , necesse est de alvi evacuationibus tempore cruditatis , sive de faecibus crudis verba facere . Raro itaque in principio acutorum erascae , naturalem figuram , colorem , atque odorem praeseferentes faeces emittuntur ; imo contra humores tenues , suboscuro , atque fuliginosi coloris saepe molestissimum , aliquando vix ullum foetorem emittentes evacuantur . Dum haec accidunt , magnam stimuli actionem , atque summam humorum alcaliscentiam in intestinis desse dignoscimus . Hoc confirmatur diarrhoea infantili a lactis alcaliscentia generata , alvi fluxu scorbuticorum , & similibus . In omnibus etenim hujus naturae evacuationibus humores viridem semper colorem vergentes non aciam , sed alcalinam indolem ostendunt . In genere siquidem humorum ad extremum productae

ctae corruptiones omnino alcalinae sunt. Hanc corruptae evacuationis speciem observamus in principio malignarum, & pethechialium Februm, in variolis sanguineis, & in periculoso erysipelate. Hae deinde putridae evacuationes in chronicis evenientes signum sunt lethale, quemadmodum in hydropicis, & phthificis accidit, & uti etiam observatur in magnis externarum, internarumque partium abscessibus ob puris resorptionem. Rursum tenues, ac putridae evacuationes si in chronicis a peculiari aliquo medicamento excitantur, admodum periculosae sunt, uti est ex.gr. colliquativa hydropicorum diarrhoea inopportuno extracti cicutae usu procurata. Si descriptae subtilium substantiarum egestionem, quae in primo septenario acuti morbi apparent, neque copia, neque qualitate peccant, simulque nec maximam virium debilitatem, convulsiones, aut petechias afferunt, sunt procul dubio crudorum, & acriorum humorum evacuationes. Tunc si pulsum robur viget, & nulla respirationis difficultas deprehenditur, crassae, foetidae, morbumque judicantes evacuationes tempore critico expectandae sunt. In acutis vero febribus utilior profecto est alvi stypticitas in primo septenario, quandoquidem causae morbificae concoctio per regularia progreditur temporis intervalla, nullaque insigni molestia excitata ad crism pervenit. Contra alvi fluxus coctionem prohibet, si inopportuno tempore apparet; siquidem ob virium defatigationem morbi evadunt longissimi. Idem dicendum

dum de reliquis praematuris evacuationibus, & praesertim de sudore. At si diversimode colorata excrementa, viridia nempe, nigricantia, & atra bile tincta in principiis evacuantur, morbus modo periculosus, saepissimeque lethalis erit. Alvi fluxus initio multarum aegritudinum pessimum est signum, uti saepe observatur in puerperis, in quibus diarrhoea cum acuta quidem febre conjuncta periculosissima est; sine febre contra lacti per inferiora salutari evacuationi tribuenda est.

Cruditatis tempore elapso, dum humores noxii a sanis separantur, magni momenti molestiae oriuntur, & tamen perfectam coctionem nobis ostendunt. Tunc omnia emunctoria proprio munere funguntur, & morbosas emittunt substantias. Hinc si per alvum morbus judicari debet, critica oritur diarrhoea, tenuisque humores una cum crassis substantiis evacuantur, symptomatum hoc tempore imminutio observatur, adeoque crisis cum tolerantia, & confidentia absolvitur. Neque interest, dummodo aeger optimae crisis utilitatem animadvertit, num excreta colorem viridem, aut rufum, vel pessimum odorem habeant. Minorem vero causae malignitatem esse judicamus, si excreta aut mere biliosa, aut colore naturali, & consueta figura praedita sunt. Ubicumque vero alvus critice solvitur, biliosasque emittit substantias, dum organa supra diaphragma collocata essentiali aliquo morbo laborant, bonum. In primo enim pleuritidis septenario biliosa diarrhoea

superveniente morbus cessat. Surditas in acuta
 febre biliosis apparentibus evacuationibus eva-
 nesceat juxta Hippocratis sententiam. In chro-
 nicis aliquando, ubi pectus aqua, vel crasso glu-
 tine opprimitur, periculosa diarrhoea oritur; le-
 thalem enim in asthmatico, nullisque medica-
 mentis compescendam dysenteriam observavimus.
 Suspectae censentur quoque alvi evacuationes,
 praesertim illae, quae quamvis critico tempore
 accidunt, cum nullo tamen aegri levamine eve-
 niunt; sed contra cum universali debilitate,
 delirio, spirandi difficultate, omniumque sym-
 ptomatum incremento conjunguntur. Tunc me-
 rito faeces virescentes, & nigrae, atram bilem,
 corruptumque sanguinem referentes, mortem
 in propinquo esse praenunciant, praesertim si
 frigidus sudor adest. In acutis versus finem se-
 cundi, vel tertii septenarii si faeces excernun-
 tur crassae, admodum mucosae, & peculiariter
 lucidae, pessimum signum est: hisce enim eva-
 cuationibus supervenientibus, aegri procul du-
 bio pereunt. Quod vero pertinet ad alvi san-
 guineas evacuationes, si sanguis ante septimum
 in variolis, malignisque febribus per alvum
 excernitur, at fluidissimus, & suboscureus appa-
 ret, praesagium morbi periculosissimum est.
 Sed contra procedente secundo septenario in
 omnibus imi ventris morbis, & praesertim in
 hepatitide fluxus sanguineus optimam judica-
 tionem praenunciat, quia biliosis evacuationi-
 bus supervenientibus morbus integre judicatur.
 Critica haec sanguinis evacuatio in morbis imi

ventris a sapientissimo Hippocrate inter salutaria signa collocabatur. Nam juxta ipsius Hippocratis sententiam, *qui dolore hepatis laborant, si sanguine per alvum egesto salvantur; non evacuato pereunt.* Quod quidem frequenter in nostra regione, atque in morbis biliosis observatur. Sed reliqua ad alvi evacuationes pertinentia facili negotio ex variis Hippocratis scriptis eruuntur.

Inter superfluos, atque excrementitios humores vitae, & sanitati substinendae admodum necessarios merito recensetur urina, quae aquosis magna ex parte, ac deinde sanis ammoniacalibus principiis constat, ac dato caloris gradu in vapores solvitur, neque coagulatur, atque concrescit, nisi lymphæ vitiosa sit retenta. In hominis statu sano urina donatur colore subluteo, sive paleari, pellucida est, & fere semper multo gaudet sedimento, multam scilicet crassam, terreamque materiam deponit. Hujusmodi vero in urina qualitates observantur, cum ciborum digestio, rectaque subactio omnino absoluta est post somnum naturalem, nullisque animi, corporisque exagitationibus perturbatur, sicuti post evacuatam necessariam insensibilis perspirationis copiam. Descripta modo urina, quae etiam in sanissimo homine albam, suspensamque nubeculam ostendit, quae in pueris aquosior, magisque in feminis esse solet; cocta, naturalis, & colorata dicitur. Attamen etiam absque essentiali aliqua morbosa corporis perturbatione urina mutatur; etenim
vel

vel turbida, vel omnino aquosa, vel valde crassa, sedimentoque scatens copiosissimo, vel magnopere rufa, & colorata evadit in dolore capitis a crapula, in depravata digestionem, praesertim post coenam, in vehementissima corporis exagitatione, & post praeternaturalem sudoris, aut perspirationis evacuationem. Quantitas urinae in homine sano proportionalis est aetati, temperamento, vivendi generi, transpirationi, exercitationibus; sequitur etiam rationem tempestatum, & omnium mutationum, quae in atmosphaerae statu eveniunt. Pueri saepissime, infantesque praesertim jugiter fere mingunt; carnes enim habent humidiores; senes frequenter ob partium relaxationem, sed parciter urinam emittunt. Qui obesi, phlegmatici, & ad cachexiam proni, urinam emittunt abundantem; contrarium accidit in biliosis, sanguineis, firmissimoque temperamento praeditis. Victu qui utuntur herbaceo, magis vero qui plantas vel aromaticas, vel diureticas, acidas, vel laxantes inter cibum adhibent, abundanter mingunt. Nimirum, quod vulgari notum est experimento, urinae copia, sive quantitas proportionalis est quantitati potus quotidiani. Verum quamvis hoc constanti confirmatur experientia, attamen multorum hominum, qui quocumque potu abstinerunt, testimonio probatur, quod urina semper assumptis cibis quoad pondus aequalis emittitur, neque interim nulla in corporis sani actionibus perturbatio ne animadvertitur. Exercitationum vehementia

ra non rufam modo; sed parciffimam; acerrimamque reddit urinam; quique valido motu exagitati, profufoque sudore madidi mingunt, urinam foetidiffimam emittunt. Anni temperatae, quae vel nimio calore, vel frigore infenfo eminent, cutem modo laxare, modo cohibere valent; ideo nos per hyemem plus, per aestatem minus mingere solemus. Accidentalialenique animi pathemata urinarum copiam vel augent, vel imminuunt, uti in subito pavore accumulatur, in ira cohibetur, & in moerore. Sani hominis urina ex adnotatis perturbari confuevit; statimque incipiente essentiali aliquo morbo cruda evadit, aquofa, & quasi ad album colorem accedens; apparet faeciffime turbida, corrumpitur etiam in acutis non modo, sed frequenter etiam in chronicis. Februm acutarum initis, in omnibus nervorum affectionibus, in quibus fpaftmodice contrahuntur mufculi, in paroxyfmo hyfterico, atque in hypochondriaco, in capitis doloribus aquofa, & cruda redditur urina. Ad chronicos morbos quod attinet, animadvertendum, quod fi de praecipua ventriculi, inteftinorum, atque menterii laefione agitur, fi admodum depravata digestio pro caufa agnofcitur, tunc urinae fempallidae, aquofae, & crudae confpiciuntur a denegata, prohibitaque craffioris chyli abforptione propter vaforum abforbentium obftructiones. Contra vero fi morbus ab hepatis obftructione pendet, urinae rufo colore tinguntur, luteoque faturo colore; quia bilis elemen-

ta, quae in obstructo hepate secernuntur, & per propria emunctoria emitti nequeunt, cum sanguine ad renes copiose feruntur, urinamque bilioso colore inficiunt. Rursus ubicumque pulmones vel ulcere, vel vomica, vel tenaci lymphæ inficiuntur, etiam absque insigni febrili calore, urina secernitur rufa; siquidem in pulmone affecto, atque ad suppurationem vergente magna semper phlogisti copia colligitur, quae tantum in urina inflammationem inducere valet.

Non autem coloris intensitas aequè crudam reddit urinam, ac color aqueus; etenim duplici hac ratione urina in genere a coctionis statu recedit: & sane urina intense rubra, quae in principiis febrium inflammatoriarum, in hepatide, pleuritide, phrenitide deprehenditur omnino cruda censenda est; hinc quo magis colorem illum amittit, eo potius ad coctionem accedit. Omnes profecto morbi phlogiston pro primaria causa agnoscetes, servato temperamento, aliorumque accidentium modo, urinam efficiunt saturo colore tinctam. Irritatis scilicet calidissimis sanguinis particulis omnium organorum fibræ, evaporatis tenuioribus humorum elementis, qui supersunt humores crassi, copiosissimo saturantur phlogisto. Hinc inflammato-riæ febres a sudore foetido, rufaque urina, pulsu duro, vibrantique dignoscuntur. Hinc in tertiana, & quartana post copiosissimum in remissione sudorem urinae valde rubrae apparent. Hinc in vehementi febre spiritus foetet.

Hinc

Hinc dissipatis per cutanea spiracula activo calore subtilissimis aquae particulis, etiam in sano homine urina mingitur saturatior. En contra quare balneo frigidiusculo urina febricitantis insigniter rufa ad naturalem, palearemque colorem accedit; balneum enim & aquae absorptionem gignit, & phlogisti magnam copiam aquae communicat, quod quidem vulgari-
 bus experimentis evincitur. Sed affectiones primarum viarum, quae aliquando ab alcalini, saepissime vero ab acidi principio redundantia oriuntur, sunt potius, ut vetustiorum Medicorum vocabulo utar, affectiones frigidae; nam oscula vasorum lacteorum vel acido, vel alcalino acerrimo sale adeo constringuntur, ut nutrientis chyli particulae, acidaque alimentorum roborans pars nequeant canalibus sanguineis communicari. Frigidae etiam merentur dici affectiones illae febriles, quae manant a cohibita perspiratione, quaeque urina cruda, sed aquosa, & pellucida distinguuntur. Constrictis enim generali cutis corrugatione poris, nulla acidi, phlogistique portio ad colorem naturalem urinae communicandum intus suscipitur. Hujusmodi explicationum fundamentalis doctrina luce meridiana clarior doctissimorum Virorum observationibus, non hypotheticis, fervidaeque imaginationis commentis innititur. Ut vero ad practicas regulas veniamus, ex dictis colligitur, urinas crudas (loquimur hoc in loco non de aquosis modo, sed etiam de rufis) esse incipientis morbi initium; semper enim deprehenduntur

tempore irritationis, dum scilicet pulsus sunt parvi, ac duri, vibrantesque, respiratio difficilis, impedita, ac profunda, calor maxime adauctus, & intollerabilis, doloresque saepe in variis corporis partibus exurgunt. Confirmantur superiora observatione urinarum in convulsivis affectibus, passione scilicet hysterica, morbo hypochondriaco, epileptico, & similibus, quandoquidem semper in hoc casu urinae aquam limpidissimam referentes emittuntur. Quod vero de urina cruda saturum colorem praefeserente adnotatum jam est, exemplo desumpto ab ictero non modo acuto, sed etiam chronico, & ab omnibus mere inflammatoriis febribus; haec qualitas evanescit, dum morbus ad coctionem vergit tunc enim urina rufa; non diaphana est, sed turbidam nubeculam primo ostendit, deinde crassum valde, & copiosum sedimentum demittit. Quamobrem si descriptae desiderantur apparentiae, morbum adhuc in cruditate versari animadvertendum. Aquosae, tenues, & omnino crudae sunt hydropicorum urinae, nisi organi alicujus, utpote hepatis, aut pulmonis inflammatio inceperit. Idem evenire solet in simplici dysenteria, & diarrhoea diuturna, dum scilicet nullam febrem habent adjunctam. In magnis acutisque doloribus, in capitis perturbatione, atque in omnibus a cohibita perspiratione provenientes incommodis, magna pars horum morborum, in quibus urinarum cruditatem observari dictum est, oritur aut ab organica viscerum digestionis infer-

vien-

gentium labe, aut a corruptarum in intestinis
 abulantium substantiarum maxima compressio-
 ne, a qua morbi etiam acutissimi originem
 trahunt. Quo diutius permanent urinae crudae,
 morbus erit longior, & contra, ut apprime ab
 Hippocrate animadvertitur in Aphorismis: *Et*
urinae, & alvi egestionis, & sudores apparen-
tes indicant & aegre, & facile judicandos, &
breves, & longos morbos. Et alio in loco:
Quibus urinae pellucidae, albae, malae, maxime
utem in phreniticis cum compareant. Galenus chro-
 nicos, peculiareque morbos describit in quibus
 urina cruda lacteas chyli moleculas admixtas
 habere videtur, ut est diabetes, a qua univer-
 salis nutritio deficit, urinae crudae profluvio
 existente. In phthisi contra pulmonali urinae
 sunt crudae, & tamen rubrae cum extrema ma-
 gitudine; primo quia febris quotidie accenditur ob
 pulmonis suppurationem, deinde quia nulla
 operari potest benefica concoctio. Ex dictis
 nullissima in praxi doctrina sequitur, numquam
 scilicet efficaciora medicamenta esse propinan-
 da, neque de morbi eradicativa curatione co-
 gitandum, dum cruditatis signa in urinis ap-
 areant. Haec enim cruditas cum reliquis cru-
 ditatis phaenomenis comitatur; sed tempus est,
 ut ad urinae coctionem sermonem convertamus.
 Constanti observationeprehenditur initium
 coctionis esse vel suspensam nubeculam modo
 rubram, modo albam, quae *aeneorema* graeco no-
 mine designatur, vel diffusam per totam uri-
 nae massam crassam substantiam, quae deinde
 fun-

fundum petit , & saluberrimum sedimentum efformat. Concoctae urinae color numquam rufus , obscurus , nigricans , aut croceus est ; sed amissa pelluciditate , sive potius colore aquoso magis paleares , & densae evadunt . Respondet hujusmodi in urinis mutatio reliquis accidentibus morbos comitantibus , & eadem ratione qua vel plus irritata laxatur , vel rigida cutis mollescit , aut lingua arida humectatur , urinae nubeculam , aut sedimentum ostendunt . Itaque si citius coctionis signa in urinis apparent , citius reliquae judicatoriae evacuationes apparent .

Critica urinae evacuatio statim tempore orta solet aliquando cum ardore , & molestia non parva absolvi , quae a particulis vitiosae naturae cum urina mixtis pendet . Verum saepenumero dum morbus hac ratione judicatur , nulla per sentitur peculiaris sensatio , quia causa morbosa acris naturae coctione jam sublata est .

Inter morbos acutos nonnulli facilius , nonnulli contra rarius copiosa urina terminantur . Prioris generis sunt febres omnes ab insensibili transpirationis defectu provenientius , morbi omnes cutanei , ipsis variolis non exceptis ; siquidem dum variolosi tempore suppurationis multam , & admodum sedimentosam mingunt urinam , facillime , ac bene judicantur ; ideoque semper in morbis externis inspiciendae sunt urinae . In erysipelate dummodo agitur de causa morbi externis partibus haerente , urina-

um judicatoria evacuatio morbum solvere con-
suevit ; sed plerumque affectio haec cum pri-
marum viarum infarctu conjungitur, & per al-
vi evacuationes ducitur . Memini me vidisse
mictum cruentum copiosissimum erysipelati ab
externis intropulso supervenisse cum integra
morbi judicatione . Capitis dolores cum acuta
quidem febre , phrenitide , gravissimisque aliis
accidentibus raro per urinae vias dissipantur .
Sed ab urina capitis dolorem aut adesse , aut
expectari debere admonemur juxta Hippocra-
tis admonitionem .

Pectoris acutae affectiones , catarrhus prae-
sertim suppuratus cum febre vehementi , pleu-
ritis , peripneumonia notha , urina fusca judi-
cari consueverunt , & tunc crassum furfuraceum
sedimentum in lotio deprehenditur . Ex pulsu
autem hujus criticae evacuationis signum erui-
mus ; siquidem si tempore judicationis qui su-
periores , pectorales , dum scilicet vibrantes ,
& elevati erant pulsus , statim inferiores , par-
vi , inaequales , ac fere tremuli fiunt , atque
pulsus sinister in parte anteriori durus , vehe-
mens cum inaequalitate evadit ; tunc critica
per urinae vias morbi solutio erit expectanda .
Urina vero in memoratis judicationibus sem-
per concocta evacuat ; dummodo enim rema-
net cruda , nullum sanitatis signum effulget .
Acuti hepatis morbi , utpote hepatitis , & quae
generatur in hepate longa , diuturnaue obsiru-
ctione vexato , & quae sanissimo alioque in
homine accidit , urinam semper in primo se-

ptenario efficiunt rufam, vel croceam, neque nubecula, neque sedimento refertam, unde morbi cruditus determinatur. At dolore partis affectae remittente cum pulsum majori irregularitate, urinae fiunt crassae, sedimentosae, biliosumque colorem per gradus amittunt. Attamen si diuturno hepatis dolore cum brevi febricula per noctem ingravescente aeger perturbatur, tunc urinae crudae fere albae, & turbidae suppurationem in hepatis substantia jam efformatam ostendunt, atque hoc practicis observationibus confirmatur. Ventriculi dolores acutissimi si non abeunt in lethalem inflammationem, ab urina aquosa, ac tenui distinguuntur, quod quidem minime affectionis indicium praebet. Vehementi in dolore ab abscessu stomachi inferiorem partem occupante, in lienis degeneratione urinae crudae quidem semper usque ad perfectam suppurationem apparent; postea vero nubeculam albam, vel sedimentum album optimae naturae ostendunt. Rursum in vesicae urinariae morbis urinae ratione viarum immutari solent. Nam si inflammatione corripitur, tenues primo quidem & rufas generat, deinde crassas, & sedimento fursuraceo refertas. Si rursum exulceratur, confusae evadunt, albicantes urinae, & purulentis filis replentur. Furfures cum urina valde colorata, & loturae carnis simili de calculo vesicae nos admonent. Urinae penitus sanguineae a generali primum sanguinis dissolutione eveniunt; siquidem huius fluidi particulae, dum causa morbifica subdividuntur, tubu-

ulorum urinae fecernendae inservientium oscula
 ubeunt. Caulae etiam phlogisticae cuti haerentes
 introvertuntur, renibus impactae plethoram,
 & lacerationem non raro generant juxta erysipe-
 atis exemplum supra allatum. Interdum acci-
 dit non in acutis modo, sed maxime etiam
 in chronicis, aut organo aliquo suppurato,
 quamvis collocetur extra vias urinarias, ut uri-
 na purulentum semper sedimentum emittat. Tu-
 mores abdominales hepatis, mesenterii, lie-
 nis, ventriculi quotidie hanc nobis urinae pu-
 rulentae observationem ostendunt. Vidi egomet
 magno abscessu venarum haemorrhoidalium,
 & a fistula ani aegrum horis matutinis urinam
 purulentam reddere. In phthisi pulmonali cum
 renis sinistri dolore urinae mittebantur puru-
 lentae; tamen post aegri mortem nullam de-
 prehendimus in renibus exulcerationem. Hoc
 autem raro accidit, quandoquidem phthysicorum
 urinae fere semper crudae saturum, inflamma-
 tumque colorem praeferunt. In hydropse tho-
 racis hujusce evacuationis parcitas magna adest,
 urinaeque valde saturatae esse solent. Si nigrae
 appareant urinae, signum est lethale in morbo
 acuto; generalem siquidem sanguinis, omnium-
 que humorum corruptionem, & degenerationem
 significat. Quae statim corrumpuntur, lacteae-
 que, & putridae videntur, magnam adesse in
 ventriculo, & intestinis vitiosam saburram de-
 notant. Omnia, quae de urinis proposuimus, ex
 practicis observationibus eruere conati sumus:
 multa hujusmodi naturae, maximaeque utilita-

his dogmata habent Hippocratici Aphorismi. Multa in aliis Divini Senis libris reperiuntur, reliqua ex Galeno, pauca vero ex recentiorum scriptis eruuntur.



C A P U T VII.

De Signis Externis a Facie.

IN omnibus itaque morbis juxta Hippocratis effatum primum omnium inspicere oportet faciem aegroti, ut dignoscatur, num a naturali secundum corporis habitum differat, & quaeenam praecipuae sunt mutationes. Color primo uniformiter pallidus, & magis, vel minus ad cinerum vergens nutritionis depravationem, solidorum debilitatem, caloris imminutionem, & praecipuam viscerum naturalium affectionem ostendit. Rursum si in facie pallida genae admodum rubent, & cum rubore macies summa, & collapsus carniū circa tempora, & circa os adest, tunc agitur de gravissimo, atque essentiali pectoris morbo. Descriptus color periculosum phthisis pulmonalis statum indicat. Attamen si pallidus color cinereo, & fusco obnubilatur velo, simulque cutis valde lucida apparet, homo irreparabili peripneumonia laborat. Quod si aeger diuturno affectu laborans


sum.

tummore pallido tingitur colore, & si vel post
 levissimam compressionem cutis purpuream, &
 fere lividam maculam contrahit, tunc pulmones
 ob hydrothoracem gangraena affecti brevi mortem
 afferunt. Pallidus color cum oculorum langui-
 dis motibus, & tristi hujus sensationis affectu,
 cum dentium peculiari pulchritudine, unguium
 incurvatione, & elongatione auricularum con-
 junctus phthisim pulmonalem praenunciat,
 quemadmodum infra fufius adnotabitur. Contra
 vero simpliciter pallidus color cum macie in-
 signi potius habitualement diarrhoeam, quam
 morbum thoracis indicat. In aegrotantibus ve-
 ro diuturnis viscerum naturalium morbis affe-
 ctis fere semper pallor cum flavedine miscetur.
 At splenici ex luteo albo, sive chlorotico,
 & subclaro, uti Hippocrates loquebatur; hepa-
 tici vero saturatiori luteo, & bilioto colore
 suffunduntur. Verum ubi hepar acuto, & in-
 flammatorio affectu vexatur, tunc dextera ge-
 na ruberrima macula tingitur, dom reliquae
 partes ictero distinguuntur. Particularis tamen
 genae dexterae rubor ab hepatico affectu pro-
 venienti minime confundi debet cum rubore
 pleuritico ejusdem partis. Confusio, & er-
 ror tollitur ex pulsum observatione, uti in
 Nosologia dicitur. Gravissimi capitis morbi,
 & praesertim apoplexiae, atque epilepsiae faciei
 colorem essentialiter mutant. Ferrugineus, li-
 vescent, attamen lucidus apparet color; & apo-
 plexiae illae, quae a causa lymphatica, aut a
 viscerum naturalium vitio pendent, faciem ad-

modum pallidam reddunt. Neque hydropicorum apparentiae quoad colorem omnino negligendae sunt. Siquidem color ascitici a colore leucophlegmatici valde differt, atque varia morbi hujus tempora a vultus contemplatione haud difficulter determinantur. Principium ascitis nullam faciei praecipuam mutationem suppeditat, quia generalis corporis nutritio nullam immutationem adhuc substinuit. Sed progrediente morbo, & abdomine admodum inflato, ob maximam extremarum partium maciem exiccata facies fuscum, sive potius aeneum colorem assumit. Idem profecto color, sed sine summa carniū contabescentia phthisis pulmonalis initium ostendit. Leucophlegmatici primo pallidum tantummodo, deinde lucidum vultum habent, postea etiam oculos sanguinolentos palpebrarum circulo distinctos praebent. Hoc vero accidit, quia confirmato jam morbo lymphae peculiarem acrimoniam nanciscitur, ac proinde irritando, stimulandoque ophthalmiae speciem gignit. Febriles affectus ob causae diversam naturam diversimode etiam faciei colorem mutant. Febres enim inflammatoriae, quae cum horripilatione conjunguntur, in primo hoc paroxysmi stadio faciem pallidam reddunt; tempore vero incrementi facies valde rubrum colorem assumit. Sed dissolutorii febriles morbi cineream faciem, multisque livescentibus maculis adpersam efficiunt. Rursum morbi absolute phlogistici, qui a caloris absentia, generalique humorum syderatione, ac pullum ma-

gna

gna depressione dignoscuntur, a facie lethali
 pallore tincta, atque a frigida etiam transpi-
 ratione essentiali characterem mutuuntur.
 Tunc sola aegroti facie considerata diligens Me-
 dicus morbum periculosissimum esse declarat.
 Aliquando accidit, ut causa phlogistica lente
 procedat absumens omnes tenuiores humores, ac
 tunc non solum summam spissitudinem in flui-
 dis gignere solet, verum acutam maciem, soli-
 darumque partium instantaneam rigiditatem af-
 fert. Hoc in casu color faciei, & totius quo-
 que corporis aeneus, sive rufus evadit, atque
 aegroti exhalationem emittunt simillimam va-
 poribus empyreumaticis ex cornu cervi, char-
 ta, & pilis combustis manantibus. Qua ratio-
 ne Luem Veneream confirmatam ex vultu exer-
 citatus Medicus dignoscat, scio equidem, sed
 aliis designare verbis nequeo. Oculi livido
 circulo cincti juxta vulgarissimas observatio-
 nes imminuentem, vel actualem menstruatio-
 nem, aut graviditatem significant; cum hoc
 tamen signo semper faciei pallor conjungitur.
 Mulieres etiam instante partu rubicundae appa-
 rent, quia validos patiuntur conatus, & vehe-
 mentissimis cruciatibus vexantur; ubi vero in
 parturientibus facies valde accenditur, & pul-
 sus frequentissimi, duri, atque inaequales fiunt,
 foetus jam egreditur.



C A P U T V I I I .

De Signis Externis ab Oculis .

Oculorum apparentiae quoad colorem , atque quoad reliquas proprietates serio considerandae sunt . Et sane ubi visionis alacritas , & oculorum velox mobilitas adest , quae inanimatorum , atque viventium corporum characteres , mores , cogitationesque &c. magno saepe cum successu perscrutatur , optimae sanitatis signum est ; & quemadmodum sanorum oculorum mutationes varia animi pathemata patefaciunt ; ita etiam quae corpori essentiales superveniunt aegritudines , ab oculis magna ex parte intelliguntur . Neque ulla accidit in mentis operationibus praecipua laesio sine manifesta , & peculiari oculorum aegritudine . Igitur ubi acuta visionis activitas magnopere imminuitur , animalem oeconomiam valde labefactatam esse significat . Quae cerebro superveniunt aegritudines , magna ex parte oculos afficiunt . Apoplexia illos graves primo , & quasi somno hebetatos reddit ; ac rursum in paralyticis , qui remanent , affectibus bulbi oculorum prominent , non parva motuum imminutio , insignis pupillae dilatatio , quae a resolutione ortum ducit , constanter observatur , semperque stupiditatis apparentiae in hisce homi-

minibus animadvertuntur . Accidit saepissime
 post apoplexiam , ut hebetes oculi ophthalmia
 per gradus occupari incipiant , atque unus pri-
 mo tempore oculus , alter post breve tempus
 eodem morbo corripitur . Simplici tunc oph-
 thalmiae succedit totius oculi confusio , atque
 ad integram caecitatem aegri perducuntur .
 Tunc mors imminet , quia tanti momenti mu-
 ratio ab organica laesione oritur , & passim in
 horum hominum cadaveribus abscessus in in-
 ternis capitis sedibus reperiuntur . Oculi omni-
 no confunduntur , & visio perit , si a morbi
 venerei activitate caput primario tentatur . A
 cerebelli siquidem abscessibus hoc evenisse sae-
 pe observavimus . Ophthalmia acutas febres fre-
 quenter comitatur , sicca est , oculos contrahit ,
 & stimuli efficacia parvos reddit , imo super-
 venientis delirii certissimum signum est . Hu-
 iusmodi apparentiae periculosissimum morbum
 designant , magisque etiam si de corruptoriis ,
 & dissolutoriis affectibus agitur . Malignae ex-
 gr. variolae , quae merito sanguineae appellan-
 tur , statim ac ophthalmiam comitem habent ,
 lethales sunt . Hoc enim signo aut generalis
 humorum corruptela , aut organicus capitis af-
 fectus designatur . Haec eadem lethalis ophthal-
 mia deprehenditur in irreparabili puerperarum
 morbo , qui a retropulsione , atque caustica la-
 ctis acrimonia provenit . Ophthalmiae in hoc
 casu tumores , atque suppurationes oculorum
 superveniunt , lethargus deinde nascitur , sae-
 pissimeque descripta accidentia cum alterius la-
 te-

teris hemiplegia conjunguntur. Terribilis hic morbus a Scriptoribus Practicis aut omnino negligitur, aut ignoratur. Phthifici oculis solito majoribus, magis, ut videtur, prominentibus, languidis, intuitus suavitate, atque tenuium humorum in ipsis oculis superabundantia distinguuntur. Prominent vero, majoresque apparent Phthificorum oculi, quia facies, & praesertim orbitae ob summam maciem circumpositis carnibus destituuntur, omnique prorsus pinguedine carent. Languor, & melancolia oculorum generalem corporis imbecillitatem, & virium vitalium prostrationem pro causa agnoscit. In reliquis pectoris morbis oculorum apparentiae nullas peculiaritates nobis afferunt. Hinc adnotatae modo, & quidem constantes mutationes phthisim pulmonalem manifestam reddunt. Distorsiones oculorum in morbis convulsivis inter vulgatissima signa haberi debent; atque ubi distorsiones oculorum in recenter natis infantibus occurrunt, morbum omnino laethalem praenunciant. Icterus oculorum membranas flavedine inficit, ibique facile detegitur ob summam partium albedinem. Oculi alba macula medium pupillae spatium occupante affecti cataractam indicant. Pupilla vero insigniter, & constanter dilatata cum integra visionis abolitione guttam serenam, insanabilem nempe morbum affert. In maximo acutorum morborum vigore oculos aegrotantium serio inspicere, atque observare oportet; etenim si primo pellicula in exteriori, aut interiori an-
gu-

gulo, vel etiam in media parte infestantur, mortem brevi adventuram judicabimus. Tunc per gradus membranarum, & humorum oculi pelluciditas, & cum pelluciditate motus immittitur: atque haec apparentia haberi debet pro certissimo signo mox periturae vitalitatis signo. Multi sane sunt aegroti, in quibus descriptae mutationes tribus, aut quatuor ante mortem diebus eveniunt. Mitto oculorum apparentias in somno ab Hippocrate descriptas; dum enim aegroti in somnis oculos imperfecte, atque ita clausos habent, ut conjunctiva tantum appareat, vel diarrhoea adest, vel intestina vermibus replentur. Mitto singularem oculorum pelluciditatem, quae in pueris vermium etiam intestinalium indicium est. Mitto turgescentiam, sive intumescentiam anguli interni cum parvo saepe rubore, atque frequenti lacrymatione; hoc autem fistulae lacrymalis praesentiam significat. Sed satis.



C A P U T IX.

Signa a Partibus Externis Corporis.

Reliquae etiam corporis partes externae varias in morbis essentialis apparentias Medicis suppeditant. Manus primo summopere exsiccatae, & arida cute obiectae ut plurimum cum ascite conjunguntur. Tunc etiam colorem obscure fuscum habent. Nutritio praesertim in hoc abdominali morbo pervertitur, quia ascitici affectus ab organorum imi ventris diuturna obstructione ortum ducunt; ab hoc itaque principio omnia nutritionis vitia exurgunt. Thoracis deinde morbi organici, praesertim illi, qui a colluvie serosa progignuntur, quamvis a pedum oedemate, praevia difficili respiratione incipiant, cum manuum oedemate fere semper copulantur. Inflari vero in hydrothorace solent manus, postquam aeger dolores in brachiis, aut scapulis expertus est. Oedemata etiam in manibus phthisicorum apparent postremo vitae tempore, & plerumque dextera manus in hoc morbo inflatur, quia affectus pulmonum dexterum latus magis, quam sinistrum perturbant, uti praesertim pulsum observatione confirmatur. In phthisicis etiam juxta Hippocratem ungues semper incurvantur,

tur, & gibbositatem satis conspicuam in media parte acquirunt: ubi hoc accidit, morbus jam confirmatus est. Unguium vero recurvatio deprehenditur etiam in omnibus contabescentibus, quamvis pulmones a principali laesione immunes sint; etenim ungues admodum convexi evadunt, quia nutrimento copiosiori destituti ob siccitatem fibrarum versus extremitatem contrahuntur. Ceterum ungues in gravioribus morbis modo pallidi fiunt, modo lividi. Dum mors appropinquat, pallidi redduntur ungues, atque per plures horas ante paroxysmum febrium intermittentium lividi apparent, ob validum extremarum partium spasmus, a quo circulatio non parum interrumpitur. Sed ut signa ab intumescentiis desumenda absolvantur, animadvertendum primo, quod juxta generalem Medicorum observationem oedemata artuum primario inferiorum, si quo comprimuntur in loco, foveam, nempe profundae pressionis vestigium servant, pro pessimo signo habendum; hoc enim denotat carniū relaxationem, ac lymphae non modo abundantiam, sed maximam quoque tenacitatem. Tunc vulgus morbum diuturnum vasorum lymphaticorum rupturam attulisse existimat, atque ob hanc rationem morbum insanabilem esse pronunciat. Sed in omnibus fere hydropicis numquam lymphaticorum laceratio adest, atque unico tantum in casu de vera lymphaticorum circa glandulas inguinales ruptura firmissimo innixus argumento dubitavi. Agebatur enim de robusto,

flo, atque penitus athletico homine, qui dum
 magni ponderis saxum totis viribus elevare co-
 naretur, dolorificam sensationem in inguine de-
 xtero animadvertit. Paulo post pedis, dein ti-
 biae, ac demum femoris ejusdem lateris oede-
 ma apparuit sine ulla reliquarum partium ae-
 gritudine, neque peculiaris intumescencia fe-
 moris ullis umquam dissipari potuit praesidiis.
 Firma hac, veritatisque admodum proxima con-
 jectura favente, existimavi morbum a laceratio-
 ne lymphaticorum inguinalium ortum duxisse.
 Si supra dorsum oedematofum pedum hydropi-
 corum maculae rubrae, aut purpureae apparent,
 vel etiam si pedum digiti livefcunt, mors in
 propinquo est. Lethales quoque cenferi debent
 hydatides, & exulcerationes sordidae, quae ti-
 biis, & pedibus oedematofis superveniunt;
 quamvis enim per breve tempus ob copiosissi-
 mam feri evacuationem magnam utilitatem af-
 ferre videantur, semper tamen in irreparabiles
 gangraenas definunt. Hinc partibus oedematofis
 vesicatoria, & caustica praesidia numquam ap-
 plicari debent, exceptis tantummodo peculia-
 ribus, & incipientibus intumefcentiis articulo-
 rum a causa venerea pendentibus. Tunc enim
 vitium locale, & lymphae inibi collectae te-
 nacitas medicamentum valde proficuum red-
 dunt. Sed articulorum hydropicus tumor un-
 dulatione contentorum, & articuli difformitate
 distinguendus signum satis ambiguum in lue ve-
 nerea constituit; quandoquidem dum genua prae-
 sertim immaniter inflammantur, morbum sum-
 mo-

opere diuturnum, ac lymphae acrimoniam ingnem esse dignoscimus. Ideo in hoc statu morbi vesicatoria non semper Medicorum votis respondent.

Variae rursus intumescantiae species apparentes, & ad perfectam diagnosim quam maxime facientes in imo ventre deprehenduntur. Intumescit asciticus tumor abdominis ad imensam molem crescente, pallido, & raro lividis maculis adperso, pressioni cedente in principiis cum manifestis fluctuantis materiae quosae signis. Umbelicus ascitici valde inflatus apicem insigniter prominentem in abdomine efformat. Tumor tympaniticus majorem foras distractionem, superficiem parum cedentem, & resonantem habet, quia abdominalia spatia multo aëre replentur. Tympanitici vero ut plurimum pedes, & tibias oedematosas habent, quod in genuinis asciticis occurrit. Inflatur abdomen in acutis morbis cum incredibile resistētia, rarius cum dolore, & tunc meteorismi nomen tumor assumit, atque merito inter gravissima acutorum accidentia collocatur, quia aëre abdominis cavitates replentur, & phlogisticam, ac proinde admodum noxiam naturam accipiscitur. Multi etiam tumores abdomen elevari consueverunt; magis vero pertimescunt illi, qui cum molestissimo doloris sensu conjunguntur, neque insigni mole donantur. Quemadmodum accidit in gravioribus hepatis, ut splenis, & intestinorum inflammationibus, in colica etiam, & similibus. Tunc aegroti ob-

mi-

minimam quamvis compressionem acutissimum
 dolorem experiuntur. In puerperis acuta febre
 laborantibus mediocris ventris elevatio, quae
 tam durissimum tumorem repraesentat, periculo-
 sissima est, quia non modo uteri, verum etiam
 intestinorum lethalem morbum designat. Ob-
 servantur quoque diuturni tumores in dexte-
 ro, aut sinistro hypochondrio, atque a conten-
 torum in abdomine viscerum obstructione pro-
 veniunt & plerumque ab usu aquarum argilla-
 cearum, atque ab aëre palustri oriuntur. Pe-
 culiaris quoque oedematis species occurrit cir-
 ca partes gangraena affectas; sedes enim jam
 sphacelo proxima tumore emphysematico nem-
 pe aëreo cingitur, quia in carniū corruptio-
 ne vapores aëriiformes evolvuntur, & tumorem
 indolentem, mollemque in cellulosa tela effor-
 mant. Temporis angustia vetat, ut multa alia
 ad tumores externos pertinentia praetermitti
 debeant. Quamvis vero omnia fere, quae ad
 tumores venereos pertinent, silentio praeterean-
 tur, oportet nunc nonnulla, quae attinent ad
 Aneurysmata, & Varices, breviter enarrare.
 Aortae arteriae dilatationes ob immensam fac-
 ci molem exterius prominent, atque tumorem
 inaequalem admodum pulsantem circa sterni,
 & clavicularum regionem afferunt. Id accidit
 in brachio, si arteria praeternaturaliter dilata-
 tur, vel vulnere accidentali laeditur. Tumor
 aneurysmaticus popliteae arteriae non solum
 a mole & pulsatione, verum etiam a tumo-
 re cruris, & immobilitate distinguitur. Prae-
 ter-

ternaturalis aliquando abdominis intumescencia
 pulsationem vehementem ostendit, uti observa-
 tur in obstructis, atque praesertim in mulieri-
 bus menstruorum defectu laborantibus. Haec
 vero pulsatio adaucta non ab aneurysmate, sed
 potius a partium obstructione, & arteriae com-
 pressionem repetenda est. Varices deinde non ad-
 modum periculosae sunt venarum dilatationes;
 saepissime vero venae majores artuum inferio-
 rum diutius inflatae, & praeternaturaliter di-
 stractae statim lacerantur cum lethali haemor-
 rhagia, quemadmodum in praxi observamus.
 Tumores durissimi in partibus ossibus, ac tena-
 cissimi in glandulosis sedibus deprehenduntur.
 Primi generis sunt elevationes osseae, quae in
 corpore rachiticorum eveniunt, magis in pue-
 ritia, quam in proventa aetate. Ossia carpi ma-
 jorem magnitudinem in extremitate acquirunt;
 spina distortionem, aut tumore osseo peculiari
 afficitur; artus inferiores debilissimi, ac vaide
 graciles evadunt, carnes attenuantur; sed con-
 tra mentis functiones alacriores redduntur. Post
 spinae distortionem costae, sternum, & clavi-
 culae intumescunt; atque primum omnium ca-
 put magnopere dilatatur. Omnes denique ra-
 chitici abdomen habent tumidum, durum, ac
 summopere resistentem. Morbus confirmatus,
 qui a descriptis modo accidentibus facile di-
 gnoskitur, saepe ad adolescentiam mortem ad-
 fert. Tractari, & praecaveri potest rachitis
 tonicis medicamentis, & praesertim balneo fri-
 gidissimo marinae, aut dulcis aquae. Tumores

ossei essentielles, vel qui etiam secundo offi-
bus infesti evadunt, sunt gummi, & exostoses.
Gummi dicitur dolentissima periostei intume-
scentia, quae nisi celeriter aut mercurio diffi-
patur, aut mediante incisione ad suppurationem
perducitur, subjecti ossis periculosam cariem af-
fert. Exostoses deinde tumores sunt durissimi,
qui ab ipsa ossis substantia proveniunt, & a
celtico veneno originem habent.



C A P U T X.

Signa ab Efflorescentiis Cutaneis .

OMnibus usque adhuc enumeratis externis diversarum aegritudinum signis adjiciendae sunt efflorescentiae cutaneae . Et primo maculae erysipelaceae , quae in hac , aut illa cutis regione apparent , figuram habent irregularem ; a parvo principio oriuntur , deinde expanduntur , vicinasque partes occupant , ut plurimum rubicundum , raro pallidum colorem habent , atque cum intensissimo calore conjunguntur . Post primum septenarium color evanescere incipit , tumor deprimitur , & cuticula vehementi partis calore exiccata in squamas furfuraceas separatur , ac decidit . Aliquando etiam erysipelas in profundam suppurationem definit , & tunc morbus gravissimus est , quia inflammationes erysipelaceae semper a generali humorum acrimonia ortum ducunt . Variolae peculiarem habent apparentiam a morbillis prorsus diversam ; nam cum primum egrediuntur , rotundas minimas maculas representant , dilatantur deinde , foveolam in medio ostendunt , ac versus primi septenarii finem apice albo , sive principio suppurationis notantur . Benignae , & distinctae variolae tempore suppurationis pustulas circulo

rubro ornatas habent. In malignis contra nulla fere in pustulis elevatio oritur, atque quae supersunt spatia cutanea libera, maculis perfecte rotundis primo ferrugineis, deinde nigris replentur; hujusmodi maculae primo in pedibus, deinde aliis in partibus deprehenduntur. Hoc in statu variolae omnino lethales sunt, & totum corpus corruptum sanguinem per omnia emunctoria emittit. Maculae morbillorum a praecedentibus differunt, quia numquam circumscriptae, ac perfecte rotundae sunt; & quia ophtalmicum affectum, & tussim molestissimam ante eruptionem afferunt. In morbillo etiam, absoluto morbo, uti in erysipelate, cuticulae desquamatio accidit. Pustulae rariores, attamen satis magnae in acutissimis saepe febribus apparent, atque juxta Hippocraticam doctrinam morbum lethalem esse praenunciant, quemadmodum ipse etiam in praxi observavi. Aliquando dum gravissimis accidentibus opprimitur aeger, macula livescens cum parvo tumore hanc, aut illam sedem occupat, atque hoc in loco salutaris metastasis, saluberrimaque suppuratio efformatur. Minoris, ac nullius fere momenti sunt maculae illae lividae, quae in luteum colorem transeunt, ut saepissime observatur in mulieribus bilioso temperamento praeditis, praesertim dum menstruae evacuationes imminet. Valde etiam irregulares maculae coloris ex fusco lutescentis exurgunt in hominibus, qui salinis efflorescentiis obnoxii sunt, atque saepe optimae sanitatis signum exhibent.



C A P U T X I.

Signa a Doloribus.

DOlores a diuturno , aut a critico affectu excitati aegritudinis sedem , ac naturam saepissime delarant . Dividi interim debent in internos , atque externos ; siquidem interni etiam dolores ab externa quoque peculiaris molestiae sensatione dignoscuntur . Interni in sede aliqua organica oriuntur , & organi illius oeconomiam pervertunt , uti sunt cardialgia , colici , nephritici , atque vesicales dolores , qui ventriculum , intestina , renes , aut vesicam urinariam afficiunt , atque non solum vehementissimi sunt , sed etiam saepenumero lethales , quod in externis doloribus raro accidit . Quamvis frequenter , uti in memoratis morbis , internae sedes dolore primario afficiuntur , tamen externae , quibus teguntur , & continentur , partes vehementer dolent , & tunc dolor externus a partium externarum praeternaturali distractione progignitur . Semper vero si ob causam partibus internis haerentem muscoli , & tegumenta dolere incipiunt , pro signo suspecto habendum est ; quandoquidem hoc accidit , dum loca affecta ad mortificationem vergunt . In dolore colico , statim ac a leviori quamvis abdominis contactu

summa oritur doloris sensatio, post breve tempus dolore omnino evanescente gangraena apparet. Vesicae morbi cum dolore versus regionem pubis conjuncti periculosissimi sunt, quia semper in gangraenam desinunt. In partu laborioso, atque in puerperio si abdomen externe admodum dolet, non uterum modo, sed intestina quoque in lethalem inflammationem incidisse significat. Ventriculi acutissimos dolores non semper vomitu, aut alvi fluxu dissipatos vidimus; quandoquidem saepenumero in suppurationem desinunt. Dexteri hypochondrii tumor valde dolens in morbo acuto, sanguine deorsum evacuato, solvitur; & aegri sanitatem adfert. Sanguine enim non fluente per alvum, aeger perit juxta certissimam Hippocraticam doctrinam. Multi ab interna essentiali causa provenientes dolores externas sedes magnopere afficiunt, illarumque actionem funditus everunt. Visionis perturbationes magni momenti, uti gravior ophthalmia, amaurosis, oculorum suppurationes, & similia, primum a capitis acuto, diuturnoque dolore incipiunt; dolori vero oculi aegritudo succedit. Resolutiones artuum inferiorum a dolore lumborum, aut a molestissimo pedum cruciatu initium sumunt. Progrediente morbo, dolores post partium resolutiones cessant. Hinc horum dolorum periculosam semper prognosim instituere debemus. Dolores, qui circa thoracem excitantur, quamvis a causa externa oriri videantur, nam externae sedi inhaerent; tamen ab interno pulmonis morbo, nempe

pe a pleuritide originem habent. Ad dolores vero absolute externos, & qui externis sedibus sunt affixi, quod attinet, harum aegritudinum diagnosi numquam valde periculosa est. Acutissimi enim podagrae dolores, qui intollerabilem molestiam, & diuturnam vigiliam afferunt, non solum omni periculo vacant, verum securiorem etiam, magisque salutarem morbi judicationem efficiunt. Podagrici namque dolores, qui cito evanescunt, causae morbificae numquam desiderandam metastasim praenunciant. Dolores externi carnosus sedibus infesti ut plurimum aut rheumaticam aegritudinem, aut depuratorium abscessum portendunt. Ubi articulis proximiores sunt, atque tumorem modo pallidum, modo rubicundum afferunt, rheumaticam naturam semper habent. Carnes semper dolentes, & rubefactae, quae durum atque elevatum tumorem constituunt, de futura suppuratione nos admonent. Dolores deinde, qui a causa venerea oriuntur, a reliquis primario distinguuntur, quia nocte appropinquante exacerbantur, mitescunt vero horis diuturnis, atque perioslei substantiam plerumque afficiunt. In genere enim dolores omnes externi ceteris paribus mitiorem morbum nos declarant. Atque haec sunt in universum signa externa, quae sanum, aut aegrotum hominem nobis representant. Sed satis.



C A P U T XII.

De Calore Animalī.

CAlor universalis totius corporis, cui immediatum vitae animalis principium innititur, aequabilitate sua, regulari intensitate, & constanti diffusionē animalis sanitatem integram esse designat. Nec Medici, aut Philosophi tantum vitam a calore pendere existimant; verum etiam vulgares homines in dubiis casibus vitam desiderari, aut adesse simplici caloris existentia, vel defectu pronunciant. Etenim quo magis in sano homine calor crescit; vitae vires semper validiores deprehenduntur; & contra quo magis decrescit calor, celeriter ad interitum animal ruit. Signa igitur vitalitatis majora, aut minora sunt in ratione directā caloris, nec vita augeri potest absque constanti caloris incremento. Pueri, Adolescentes, & Juvenes insigni calore praediti in ipso roboris, vigentisque oeconomiae statu collocantur, quemadmodum recte Hippocrates adnotavit: *Qui crescunt, plurimum habent calidi innati.* Consistentis aetatis homines acquisitum in virilitate calorem per gradus amittunt; atque cum ad decrepitam senectutem perveniunt, lethali frigore rigescunt, & syderantur. Mulierum men-
struae

struæ evacuationes quandoque octavo ætatis anno apparent, & præmatura senectus ingruit. Aestiva nempe calida tempestate corpora naturalia si-
ve animalia, siue vegetabilia evolvuntur, cre-
scunt, vivunt, & foecundationis negotium ab-
solvunt; per hyemem contra dum terram pe-
netrabile frigus adurit, aut omnino ornatu spo-
liata debilem vitam vivunt, uti arbores, aut
pereunt, ut plantae annuae, & animalia mino-
ra. Haec omnia magni sane momenti, & qui-
dem stupenda naturæ miracula a simplici calo-
re pendent, atque a solarium radiorum influxu
gubernantur; sed ut a necessaria hac digressionem
ad hominis sani calorem gradum faciamus, ani-
madvertendum, quod calor vitalis in duas spe-
cies distingui debet juxta peculiarem, quam
occupat, sedem; etenim per se unica admodum
simplici materia componitur.

Calor itaque appellatur vel sensibilis, vel
latens. Caloris sensibilis nomine intelligitur
illa caloris quantitas, quae sensibus subjicitur;
atque quoad gradum intensitatis communibus in-
strumentis aestimari potest. Hujusce caloris
quantitas vitae sustinendae jugiter addicta ni-
hil aliud est, nisi superabundans, siue ejusdem
caloriferæ substantiæ quantitas, quae ab orga-
nis, carnibus, omnibusque humoribus rejicitur,
postquam memoratae partes, qua indigebant, ca-
loris quantitate jam saturatae, ac repletae sunt.
Calor solidis, ac fluidis intime mixtus, & ab-
conditus caloris latentis appellatione designa-
tus. Latens vero in generali viventis corporis
oeco-

oeconomia calor haberi debet pro substantia vivificantis omnino , atque animatricis naturae , quae crassioribus partibus tamquam totidem receptaculis adhaeret pro essentiali vitae necessitate . Ubicumque enim calor sensibilis ob varias causas imminuitur , & ideo corporis actiones imbecilles , languidaeque evadunt , necessaria latentis caloris quantitas , propriis relictis receptaculis , homini in subsidium venit , debilesque actiones retinet , & firmat . Hinc fit , ut quum vita aquae simplicis , quae in fluiditate a calore proveniente collocatur , ob frigoris actionem in congelatione perit ; thermometri in aquam immersi liquor statim elevetur , atque absoluta congelatione deprimatur ; quia calor in aqua latens egreditur omnino , nam fluiditatem substinere conatur , ac proinde dum latentis officio relicto in sensibilem calorem transit , aqua in durissimam glaciem vertitur , & thermometri liquor elevatur .

Caloris animalis sensibilis , atque latentis origo est ab aëre puriori , sive dephlogisticato , cujus elementa calore praesertim componuntur . Et dum pulmones subit atmosphaericus aër , statim caloris molecule absorbentur , per arterias feruntur , illarum dilatationem , & pulsationem efficiunt , nigrificantem , sive phlogisticatum venosum sanguinem in coccinneum , lacteque rubrum arteriosum cruorem mutant , atque cum animalibus substantiis copulatae motus omnes , secretiones , actiones , sensationesque absolvunt . Modo expositam doctrinam

de

de natura sanguinis venosi, & arteriosi, de via, qua calor sanguini miscetur, de causa dilatationis arteriarum, sive de origine pulsuum, & similia magni momenti phaenomena experimentis in majoribus animalibus institutis, ac priori Crawfordianae doctrinae de natura sensibilis, & latentis caloris in animali oeconomia superstruxit doctissimus, ac diligentissimus Physiologus Michael de Rosa, quemadmodum in ejus Epistolis Physiologicis argumenta luculenter testantur. Accidentia morbosa, quae gangraenas comitantur, frigus lethale constanter cum febribus ab aëre palustri, nempe inflammabili ortis conjunctum, pulsuum in hisce morbis abolitio ob caloris destructionem, aquarum argillacearum effectus, horripilationes, & convulsiones a venenis phlogisticis, & calori oppositis excitatae, atque innumera alia certissima argumenta propositae doctrinae veritatem abunde ostendunt.

F I N I S.

I N D E X.

<i>Tractatus de pulsibus.</i>	pag. 3
<i>Pulsus sudoris.</i>	27
<i>Febris definitio.</i>	39
<i>Tempore critico abstinendum a medicamentis.</i>	ibid.
<i>CAP. I. De pulsibus particularibus.</i>	41
<i>Pulsus externus.</i>	ibid.
<i>Pulsus internus.</i>	48
<i>Pulsus superior.</i>	53
<i>Pulsus inferior.</i>	56
<i>CAP. II. De pulsibus organicis.</i>	58
<i>Pulsus capitalis.</i>	59
<i>Pulsus gutturalis.</i>	62
<i>Angina maligna.</i>	63
<i>Pulsus pectoralis.</i>	ibid.
<i>Ejus cura.</i>	64
<i>Signa aneurysmatis in arcu aortae.</i>	69
<i>CAP. III. De pulsibus organorum, quae infra diaphragma continentur.</i>	74
<i>Pulsus stomachalis.</i>	ibid.
<i>Pulsus intestinalis.</i>	77
<i>Pulsus haemorrhoidalis.</i>	79
<i>Pulsus hepaticus.</i>	81
<i>Pulsus splenicus.</i>	82
<i>Pulsus vesicalis, & renalis.</i>	84
<i>Pulsus uterinus.</i>	86
<i>CAP. IV. De pulsibus compositis.</i>	89
<i>CAP. V. De signis, quae a lingua petuntur.</i>	95
<i>CAP. VI. De signis, quae ab urina, & excre- mentis eruuntur.</i>	97
<i>CAP. VII. De signis externis a facie.</i>	116
<i>CAP. VIII. De signis externis ab oculis.</i>	120
<i>CAP. IX. Signa a partibus externis corporis.</i>	124
<i>CAP. X. Signa ab efflorescentiis cutaneis.</i>	131
<i>CAP. XI. Signa a doloribus.</i>	133
<i>CAP. XII. De calore animali.</i>	136

*A. U. J. D. Salvator Ronchi perlegat , & in scriptis
referat . Neapoli die XXI. mensis Augusti 1802.
F. A. CAP. MAJ.*

S. R. M.

Nell' Opuscolo enunciato , da me con la do-
vuta diligenza letto , niente si contiene , che con-
trario sia alla Religione , ai Sacri Dritti della
M. V. , ovvero al buon costume . Sono perciò
l'avviso che possa permetterlene la stampa . Na-
poli li 26. Agosto 1802.

*Umilissimo Vassallo
Salvatore Maria Ronchi.*

*Visa relatione Regii Revisoris imprimatur. Neapoli
die XXVI. mensis Augusti 1802.*

*F. A. CAP. MAJ.
Joseph Abate Secret.*

*Visa Relatione U. J. D. Salvator Ronchi de com-
missione Rev. Regii Cappellani Majoris .*

*Die 27. mensis Augusti 1802. Neapoli.
Regalis Camera S. Clarae providet , decernit , atque
mandat , quod imprimatur cum inserta forma præsenti
multiplicis libelli , ac approbationis dicti Rev. Reviso-
ris ; verum non publicetur nisi per ipsum Revisorem
ita iterum revisione affirmetur quod concordat ser-
vata forma Regalium Ordinum , ac etiam in publi-
catione servetur Regia Pragmatica . Hoc suum &c.*

*BISOGNI . MASCARO . CIANCULLI .
V. A. R. C.*

*Il. Marchio de Jorio Præses S. R. C. , & ceteris
habiles Aularum Præfecti , tempore subscriptionis
editi .*

Pro magn. Pascale . -- Ammora .



